

乾隆汾州府志

汾州府志卷之三十三

藝文七

扈從南出雀鼠谷

唐張說

豫動三靈贊時巡四海威
陝關凌曙出平路半春歸
霍鎮迎雲罕汾河送羽旂
山南柳半密谷北草全稀
遲日宜華蓋和風入袷衣
上林千里近應見百花飛

奉和聖製同二相南出雀鼠谷

唐張九齡

設險諸侯地承平聖主巡
東君朝二月南旆擁三辰
寒出重關盡年隨行漏新
瑞雲叢捧日芳樹曲迎春
舞詠先馳道恩華及從臣
汾川花鳥意併奉屬車塵

奉和聖製荅二相出雀鼠谷

唐徐安貞

兩臣初入夢，二月扈巡邊。
湖北寒猶在，山南春半傳。
頌聲先奉御，辰象復回天。
雲日明千里，旌旗照一川。
柳陰低輦路，草色變新田。
還望汾陽近，宸遊自杳然。

奉和聖製荅張說出雀鼠谷

唐蘓頌

雨施巡方罷，雲從訓俗迴。
密途汾水衛，清蹕晉郊陪。
寒著山邊盡，春當日下來。
御祠元鳥應，仙仗綠楊開。
作頌音傳雅，觀文色動台。
更知西向樂，宸藻協鹽梅。

餞潞州陸長史再守汾州

唐蘓頌

河尹政成期，爲汾昔所推。
不榮三入地，還美再臨時。
擁

傳雲初合聞鶯日正遲道旁多出餞別有吏民思

奉和聖製荅張說扈從南出雀鼠谷

唐宋璟

秦地雄西夏并州近北胡禹行山啓路舜在邑爲都忽
視寒暄隔深思險易殊四時宗伯叙六義宰臣鋪敬作
宮常應星環日每紆盛哉逢道合良以致亨衢

奉和聖製荅張說扈從南出雀鼠谷之作

唐袁晫

魏國山河險周王警蹕迴九旗雲際出萬騎谷中來石
路行將盡烟郊望忽開賞矜垂柳報春畏落花催興逸
橫汾什恩褒作頌才小臣瞻日月延首詠康哉

奉和聖製荅張說南出雀鼠谷

唐席豫

鳴鑾初幸代，旋蓋欲橫汾。山盡千旗出，郊平五校分。前
林已暄景，後壑尙寒氛。風送蕭韶曲，花鋪黼黻文。鹽梅
推上宰，禮樂統中軍。獻賦紆天札，飄飄飛白雲。

奉和聖製荅張說扈從南出雀鼠谷

唐王光庭

省俗恩將徧，巡方路稍廻。寒隨汾谷盡，春逐晉郊來。雲
騎轉行漏，煙旄引從臺。惠風初應律，和氣正調梅。雅頌
通宸咏，天文接曙臺。霸陵桃李色，應待日華開。

奉和聖製荅張說南出雀鼠谷

唐崔翹

碛路繞河汾，晴光拂曙氛。笳吟中嶺樹，仗入半峯雲。頓
覺山原盡，平看邑里分。早行芳草迴，晚憩好風熏。嘉嶺

推英宰春遊。扈聖君共欣承。膚澤日月照天文。

奉和聖製荅張說扈從南出雀鼠谷

唐梁昇卿

何意重關道。千年過聖皇。幽林承膚澤。閑客見清光。日
御仙途遠。山靈壽域長。寒雲入晉薄。春樹隔汾香。國佐
同時雨。天文屬歲陽。從來漢家盛。未若此廵方。

故西河郡杜太守輓歌三首

唐王維

天上去西征。雲中護北平。生擒白馬將。連破黑鵬營。忽
見芻靈苦。徒聞竹使榮。空流左氏傳。誰繼卜商名。
返葬金符守。同歸石窞妻。卷衣悲畫翟。持袂待鳴雞。容
衛都人慘。山川駟馬嘶。猶聞隴上客。相對哭征西。

塗芻去國門秘器出東園太守留金印夫人罷錦軒旌
旗轉衰木簫鼓上寒原墳樹應西廡長思魏闕恩

咏郭有道

唐盧照鄰

大漢昔云季小人道遂振玉帛委閭尹斧鑕嬰縉紳邈
哉郭先生卷舒得其真雍容謝朝廷談笑獎人倫在晦
不絕俗處亂不爲親諸侯不得友天子不得臣沖情甄
負饒重價折角巾悠悠天下士相送洛橋津誰知仙舟
上寂寂無四鄰

天寶中宋州刺史有西河郡太原守張夫人輓歌

摩今

鵲印度仍傳魚軒寵賔先從夫元凱貴訓子孟軻賢龍

是雙歸日驚非獨舞年哀榮今共盡悽愴杜陵田

李中丞訓萬年房署少府過汾州景雲觀因以寄上

房與李早年同居此觀

唐盧綸

顯晦澹無跡賢哉常晏如如何驚孤鶴忽乃傳雙魚
叙以泉石舊悵然風景餘低回青油幕夢寐白雲居
玉洞桂香滿雪壇松影踈沈思矚仙侶紆組正軍書
積學早成道威恩難遂初梅生諒多感歸止豈吾廬

送單于裴都護赴西河

唐崔颢

征馬去翩翩城秋月正圓單于莫近塞都護欲臨邊
漢驛通煙火胡沙乏井泉功成須獻捷未必去經年

送汾城王主簿

唐韋應物

少年初帶印，汾上又經過。
芳草歸時徧，情人故郡多。
禁鐘春雨細，宮樹野煙和。
相望東橋別，微風起夕波。

巫山縣汾州唐使君十八弟宴別兼諸公攜酒樂相

送率題小詩留於屋壁

唐杜甫

卧病巴東久，今年強作歸。
故人猶遠謫，茲日倍多違。
接宴身兼杖，聽歌淚滿衣。
諸公不相棄，擁別惜光輝。

過宋員外之問舊莊

唐杜甫

宋公舊池館，零落首陽阿。
枉道祇從入，吟詩許更過。
淹留問耆老，寂寞向山河。
更識將軍樹，悲風日暮多。

謝汾州田大夫寄茸瓊葡萄

唐姚合

筐封紫葡萄，筒卷白茸毛。卧暖身應健，含消齒免勞。衾衣疎不稱，梨栗鄙難高。曉起題詩報，寒嘶滿筆毫。

留題汾上舊居

唐薛能

鄉園一別五年歸，回首人間總禍機。尙勝鄰翁常寂寞，敢嫌裘馬未輕肥。塵顏不見應消落，庭樹曾栽已合圍。難說累牽還却去，可憐榆柳尙依依。

懷汾上舊居

唐薛能

素汾千載傍吾家，常憶衡門對浣紗。好事喜逢投宿客，刈田因得自生瓜。山頭吹笛陰沈廟，陌上新蒸突兀車。

汝州府志 卷三十三
投暗作珠何所用，被人專擬害靈蛇。

子夏山 宋趙瞻

山因先師成，令名人心仰。止懸青冥文，侯北面欵山局。
石室至今猶南傾，直松萬株天籟聲。長材大棟資連薨，
溪泉四出照骨清。潤物功溥民罔爭，朝今新雲澤根莖。
暮兮和風發勾萌，山川氣稟天地英。民何知爲夫子靈，
魏最稱治由師經。晉俗自是多諸生，時尙辭華取未精。
皓首學行徒修明，非無神降弼王庭。國朝嘗議平文衡，
斯文未喪吾道亨。商之傳授今可行。

比干臺

宋趙瞻

九閭大壞一木支勢知不可誠不欺商之三仁異所歸
死諫不欲狂因爲賢哉萬世忠臣師比干而已前其誰
諫不當顯何所持忠必愛君無拂辭帝舜載賡歌康樂
風雅比興陳盛衰君賢臣聖流書詩光華榮輝同蕤蕤
扶起不欲憂顛危剖心血頸鼎鑊糜此意不獨在一時
死者一傳星日垂猶有佞人乘其機順正逢惡稱諷規
甘言好語解人頤如鰓食角寢不背聰明蔽密節莫知
微干之節世亦疑章華非不窮義魏姑蘇一同宗社移
名與土滅埽無遺但爲世鑒那足譏茲臺巍巍存遺基
尙覺清風洒肝脾妖狐狡兔不敢依飛沙落日予心悲

郭林宗故宅

宋趙瞻

悲哉漢末之人士。虛名譁衆世皆靡。姦邪憤怒相角觴。
潰然天下黨錮起。黨禁根剔密如此。何歟網漏郭夫子。
意在大儒照物理。逆鑒禍福以行已。才不蓋人行不詭。
謙損涵納海之水。又豈高卧安閭里。鴻飛鳳舉不可企。
前視亂國如覆軌。明哲大雅之所美。有道進退能猶是。
故宅莫問但遺址。然誰敢謂李元禮。其徒器識不能爾。

鶴鳴古洞

宋趙瞻

山勢差峩接遠峰。九臯鶴唳徹長空。清音彷彿蒼松外。
疎影依稀皓月中。石洞雲封仙去後。桑田世換水流同。

登臨厭聽黃鸝語弄巧綿蠻噪碧叢

文湖漁唱

宋趙瞻

湖光潋灩泛蓮荷欸乃漁郎慣此過
笛韻吹殘紅蓼岸
櫓聲搖出錦鱗窩
狂歌明月閒愁少
放浪扁舟適興多
蓴菜鱸魚供一醉
掉歌歸去卧煙蓑

馬跑神泉

宋盧象

將軍稱賀魯遺廟俯靈淵
蔡噴蛟龍穴波跳赤鯉泉
路迴片澗水村近石林烟
野馬含暄氣農夫出故蹕
土膏興耒耜尸祝傍山巔
閱世無銘石茲遊匪幕天
頃來規下字必葺慕先賢
悅使成能事掄材出俸錢
伉香推幹

蠱班匠擇精專，黜堊何其麗。樂櫨本自然，松青離石道。
雲白介山田，適歎飛翬速。仍憂黃雀穿，梨花寒食後。桂
籍酒樽前，饑麝尋香栢。流鶯助晚絃，吳歛摧玉竿。趙舞
落金鈿，上已無過酒。春衣試欲蒔，故園思輦洛。稌飲客
汾川，寄語西河老。鄉心朝暮懸。

魏侯故城

宋袁藏雲

獨向條陽翠靄行，杖藜徐步愴吟情。長河漫有懷山迹，
故國空傳讓畔名。遠樹半遮千木廟，斷雲猶鎖魏侯城。
可憐列土繁華地，祇是寥寥作釣耕。

和詣巖祈雨

宋皇甫韶辭

路盡山尤勝，溪深水愈豪。寺樓今不見，依舊五峰高。

宿平遙集福寺

金劉澇

院僻和僧靜，門閒與晝長。燕泥朝雨淖，蝶蕊晚風香。野興煎詩思，乾愁繞客腸。青奴如解事，供我莫臆涼。

登縣山上方

金周昂

環合青峰插劒長，小平如掌寄禪房。危闌半出雲霄上，祕景盡收天地藏。野闊羣山驚破碎，雲低滄海認微茫。九華籍甚因人顯，迥秀可憐天一方。

碧鮮堂

金趙大端

寒陰鏤碎暗僧軒，玉立森森翠滿前。墜露修梢雲影澹，

破網春筍綺文鮮雅宜冷映梅溪月尤稱香浮茗竈煙
清夜沈沈正成寐恍疑飛夢繞淇川

臨泉道中 金蕭貢

半世事行役茲游初未經峽門迷白晝嶺脊上青冥澗
曲莓苔滑松盤霧雨溟登危人跼蹐涉險馬玲瓏落日
留行客提鞭得驛亭短牆明積雪破屋漏疏星羌笛誰
三弄羈懷強一聽葭蘆知不遠河外數峰青

謁狄武襄祠 金王鑄

傑士西河秀英雄挺偉姿奮身甘衛國彌節願匡時妙
略風雲會威名草木知功高憐南服計重破西陲定亂

勞三箭平戎在一麾。勢傾銅柱遠聲振。王關奇頗收才
何濟。得吳譽竝馳。朝廷分重寄。將相賴兼資。豹略多全
勝。鷹揚屢捷師。雍容敦禮樂。談笑屈缺二字。褒錫酬車服。
勲勞著鼎彝。雲臺儼冠劍。麟閣繪形儀。錦里家仍在。蘭
陵塚不隳。風號墳上木。苔漬廟前碑。過客煩詩句。居人
奉酒卮。汾陽遺美蹟。千古話芳規。

送二道者歸汾州

金許安人

介休山下兩閒人。來訪汾陽舊使君。明日却歸塵外去。
一雙白鶴上青雲。

贈益公和尚還超山

金王廷筠

平沙漠漠鴈翩翩風弄菰蒲水拍天短艇得魚撐月去
一聲漁笛破寒煙

題南山友雲亭 金王廷筠

朝遊南山南暮遊北山北所以兩山雲盡與師相識師
自出山去雲亦出山飛兩人眇何許矯首送雲歸雲歸
人未歸小亭無恙否向來有奇姿無庸變蒼狗雲兮淡
而貞載與尋宿盟論交須耐久持贈近無情清風動亭
側明月生空碧嘉時爲招呼相與成三益

壽聖院古柏詩 金普信

老柏千株不記年滿堂中夜冷生煙不容明月秋幽地

欲作驚蛇春上天。雪後永忘夫子道。風前猶記祖師禪。
曉聞寒韻披衣起。錯認廬山落澗泉。

途次張南

金石玠

迢遞張南驛。蕭然動客愁。天風吹木葉。落日盡城頭。兵
氣逢秋肅。河聲入夜流。那堪久行役。搔首獨登樓。

送王子壽之平遙

元段成已

卜築謀南邁。回轅遽北之。有情慚見厚。無語只空悲。易
忍行時淚。難堪別後思。明年鴈到日。屈指數歸期。

過鹿臺山

元王惲

遠尋文石岡。來歷南山纒。鹿臺臺爲山。幽徑蟠古篆。後

峪行未盡前嶺已當面秋聲蕩林樾風露淒以泣陰壑
氣蓊鬱疑有虎豹變山田苦無多溝畹耕已徧柴爰結
半空羅絡碧巖轉自憐終歲勤獸患防一旦我本山中
人束帶對郵掾頓然還舊觀瀟灑償夙願行經雙蟾嶺
石怪驚變現闖首擗樹間氣自太古練月中誰推墜囚
鎖屬山縣乃知北平守認虎飲羽箭物肖本偶然長歌
下層巖

汾州北席里石氏節婦

元陳旅

北里高樓晝掩扉水銅光冷上苔衣寸心誓比南山石
汾水秋風鴈不歸

義棠廢橋

元鈕克謙

鞭石駕空虛伐山頽崩劣長橋當面起陰靄見虹霓汾
河動地至崩濤響霆霹勢壓銅山摧風馳羽箭激水石
相撞擠群鯨隨蕩折百年締造功遭此洶水擊遂令北
村民往來無翼翼提榼廢朝沽負囊嗟暮糴坐見病涉
圖何由救漂溺憶昔結構初十鍾震駭素飛空百丈梯
運石如運甓橫亘截雲峰突兀立鐵壁萬物無堅牢世
事等飄歟獨立沙堤邊蒼茫何所適

登南城樓

元楊乘

南來綿水抱城隈灑灑流沙去復回却上高樓看山色

畫圖十幅雨中開

送友歸介休 元魯猷

游踪曾向薊門過，樂府刀環夢裡歌。
今日青山真踐約，奚絲應比昔年多。

題郭林宗墓 明薛瑄

幾經滄海變桑田，高塚長留古道邊。
瑞鳳有時鳴曉日，冥鴻終古沒秋煙。
關河迢遞膺舟隔，江漢空茫雅信傳。
千載有碑應不愧，路人猶自識高賢。

過孝義縣有感 明于謙

茫茫煙樹遶孤城，千古猶傳孝義名。
郭巨墓荒春草合，

比干臺古野煙生落花飛絮迷征旆
剩水殘山惱客情
鞍馬匆匆無限意不堪回首暮雲平

介休道中

明程可中

征旅聊蕭當勝游庶饒那復數中州
雪融隙地培桑棗
日出通衢噎馬牛望望繇山侵面出
時時汾水避人流
太行春色黃河外猶自嚴寒滿敝裘

超峯曉月

明任良才

聳出千山接太空山頭初曉月溶溶
晴嵐蚤霽橫青黛
湫沼洄瀾映碧瓏五月花殘無湛露
三春松古有寒風
幽人策杖登臨日天下奇觀一望中

源池潤民

明曹武

寒泉漱玉徹清流。曲轉餘波兩岸秋。浪卷平原黃種熟。
雲迷沃野綠陰稠。池心帶雨千波碧。水面凝煙一鏡幽。
試問村墟勤歲叟。膏泥深處出瓊羞。

詠周卿士將臺

明任良弼

山城周室六軍臺。世遠星移紫霧埋。將壘四圍無鐵馬。
女牆半落有蒼苔。殿廊重建人安在。草木成林鳥復來。
從今誰主爭雄地。明月清風任往廻。

送客遊長春觀

明賈璇

長春觀裏最幽清。送客西歸適我情。獨賞孤松含晚翠。

不看衆木占先榮。四圍山色濃還淡。一派河流縱復橫。
若說仙家都是幻。何如拍手鶴來鳴。

宿鋤溝鎮和石橋韻

明王素屏

白髮年來種種生。幾回對鏡使人驚。故鄉北望三千里。
官路西行數十程。廿載離家緣薄宦。半生悞我是虛名。
夜深孤館渾無寐。獨伴寒燈待月橫。

段干木祠

明王翰

殺妻吳起非良將。食子樂羊真鄙人。爭若先生無一事。
西河能解虎狼秦。

羊羔酒出山西汾州孝義諸縣白色瑩徹如冰清美

饒風味遠出襄陵之上小挾羶氣耳

明王世貞

清心玉映五銖衣。可是朱顏有慍羝。爲道臯蘭秋月下。
流蘓帳底見明妃。

三陽雲鳳山

明張淵

華嶽當年是舊遊。此間何日醉蒙頭。官辭諫議歸仙洞。
醉識真人下酒樓。優詔九重丹鳳杳。野心一片白雲留。
三陽山上空塵蹟。只有長河水自流。

題林宗

明祝顥

四海頽波正橫流。寧裳猶自遠周遊。笑談不顧三公辟。
標榜終懷八顧憂。舉世英豪攀逸駕。至今風度想仙舟。

松青雲白南山下，多少行人拜墓邱。

謁狄武襄公墓

明祝頤

蚤因黥涅募從軍，天賦英姿迥出羣。
動合兵書真熟武，閒觀經傳亦通文。
高明不受梁公像，智勇能追漢將勲。
慨想丰標豈易得，爲停車騎拜穹墳。

謝郡侯張公禱雨輒應

明孔天胤

使君閔雨愜靈心，一請垂天三日霖。
笙鼓水龍喧社處，兒童竹馬躍城陰。
青山閣眺晴光滿，翠野帷褰秀色深。
歲有何人不稱慶，老農先奉萬年吟。

望介山緬懷郭有道先生

明孔天胤

鴻飛白雲中。衆鳥徒營營。達士一何遠。杳然凌太清。內
蘊保身哲。外無絕俗貞。橫波順仙棹。角巾偶華纓。誓將
斷巨鰲。支彼天柱傾。時哉不我與。高嶺獨含情。

送李西渠通府署汾畢事還路

明孔天胤

五龍高郡出浮雲。一鶴清風借與汾。月在冰壺同亮采。
雨隨芝蓋下晴曛。舊疆還守車仍邁。新館留行袂竟分。
東望迢迢盡烟樹。可勝嵐嶺復氤氲。

贈程一山叅戎始建牙汾郡

明孔天胤

北闕授符推轂後。西河分閫建牙初。宏修軍禮昭文幕。
遠聞兵威到朔廬。戍靜關山和月唱。氓安隴畝帶經鋤。

方知上將收全勝，頓令邊庭絕羽書。

贈張龍巖太守入覲榮旋

明孔天胤

春日朝迴守舊疆，萬家烟景襲餘光。
桃紅細雨隨車下，蘭葉香風引綬長。
再見王君馳蜀道，重逢寇老借河陽。
依然美稷兒童輩，竹馬紛紛迓路傍。

仙槐觀訪王全真道士

明孔天胤

搶榆猶不至，容與道林翔。
庭儼更生樹，人修不死方。
詩瓢逢隱逸，茗椀酌清香。
無限青霞意，偏令此地長。

題林宗墓

明沈伯咸

小雨綿山過野田，林宗古墓夕陽邊。
鴻飛萬里芝留澗，

鶴返千秋松卧煙落帽清風爭折角蕩州春水擬登仙
勤予亦致生芻蕘敢謂同心企大賢

鐵索嶺

明趙訥

節節高巖上誰知復有山便當安見在何事費躋攀天
險本自絕人爲故不閒因憐好進者豈止仕途閒

普濟渠

明趙訥

城居厭煩煥偶到南山隱屋舍溪流處田園雨後時野
花鋪作繡嘉樹列成帷霧隱無如此慚非玄豹姿

廣仁寺

明趙訥

高秋尋遠寺萬象與心清窻竹籠僧語簷風遞磬聲波

澄禪意定葉落俗緣輕但得閒中趣何須世上名

興國寺

明趙訥

勝遊憑地主流憩有柴門預問登山路還將窮水源古
槐列疏冷老栢聳駢繁閒對高僧坐鳴鐘晝已昏

題介子

明趙訥

蒼蒼綿上遙松柏滿山椒古廟今猶在遺魂不可招乾
坤留舊蹟陵谷變前朝斜日西風起林巒自寂寥

早度上店嶺

明宋岳

征輿當曉發麾劍倚秋風霜葉紅千樹雲山碧萬重村
童喧吸水野老醉攜筇藩守慙多拙惟應喜歲豐

卜山書院

明慶成王朱知燦

卜山擁翠勢崢嶸，世遠空堂草自橫。
澗底寒流鳴咽裏，令人疑是讀書聲。

謁狄武襄公祠

明范珠

宋祚方興寇未平，將軍百戰捍危城。
流言難泯生前節，信史猶傳身後名。
八尺穹碑蒼蘚合，一區故宅野雲橫。
晚來風撼溪山樹，彷彿南征萬馬聲。

過黃蘆嶺題

明楊璿

冉冉夕陽西，行行信馬蹄。
亂雲山遠近，碎石路高低。
黃鼠作人立，玄猿迎客啼。
自緣羈思切，觸景轉淒淒。

懷古 明楊伯柯

郭林宗

東京主德衰舉世尙揚摧士論日以清朝政日以濁不知禍所基猶自矜高卓及乎黨錮興善類遭掎掎賢如李杜輩駢首就刑劓哲哉郭林宗千仞翔鳳鸞和不與物比清不與衆角立身有常儀譏怨無由作至今士一邱士林仰先覺

秋青 明楊伯柯

將軍奇特士發身自行伍志畧旣過人姿壯復英武敵人望其來畏之若猛虎初破元吳師遂荷范公許一握

大將符勃勃氣愈吐。僂寇方鴟張。一戰成逃虜。此功亦甚高。予獨別有取。不除黥面文。不認梁公祖。一事出真誠。卓哉越千古。

校士喜雨

明趙喬年

同雲瀾漫雨垂垂。正是三農閔望時。太守何能尸帝力。皇穹原自軫民危。煙籠棘院龍蛇舞。霧擁文林桃李滋。自此西河多樂事。微臣擬獻太平詩。

汾州閔武

明魏允貞

親提虎旅控西河。聞道匈奴遮塞過。閫外秋聲生鐵甲。臺前霜色上雕戈。材官一夜精神倍。野戍三秦殺氣多。

安得普天烽火熄，盡將鐃吹變笙歌。

卜山書院

明慶成王朱慎鍾

洙泗傳經業，河汾退老居。山深惟石室，泉隱自林墟。樹
鳥鳴先哲階，蟲篆古書聖。門重高尚，千載仰芳譽。

過金鎖關題

明朱鳳岩

世事已如此，勞勞愧此生。十年塵土夢，萬里故鄉情。曲
路稀人跡，高天有鴈聲。羞看白髮變，忽爾壯心驚。

文湖漁唱

明鄭儀

萬頃銀濤裏，扁舟雜往還。煙消然竹籜，日上整綸竿。睡
足蘆花月，歌殘雲水灣。得魚橫野渡，心與白鷗閑。

題法興寺

明朱表術

載酒東林上巳前，春風消息杏花邊。
日長塔院逢僧奕，草暖堦除見鹿眠。
流水漸融巖洞雪，清霄未散石堂煙。
平生也解求心性，一到禪關一了然。

亂後過天寧寺

明朱奇涵

禾黍離離烟滿川，寥寥孤鴈夕陽邊。
將軍馬繫禪林下，借得僧牀一覺眠。

鶴鳴古洞

明崔士榮

山人騎鶴入遙空，祇聽餘音振谷中。
遺跡千年成勝景，浮生半世類飄蓬。
黃花招客樽盈綠，碧洞棲雲木落紅。

忽憶家山深隱處，巢山高轍許誰同。

宿吳城驛

明黃素屏

登登鳥道亂山多，白草黃蘆遍石坡。
絕壁倚空凝積雪，飛流直下激層波。
紅塵歲月驚秋盡，清鏡勲名奈老何。
立馬西風增感慨，籌邊何日許重過。

過有道先生墓

明沈鍾

草根沙軟霜花白，客衣馬上寒於鐵。
介休縣僅半舍餘，突見高墳俯城陌。
乃知縣人郭林宗，千古於茲妥魂魄。
挽衣下馬立斯須，北面稽首躬趨謁。
憶昔漢季丁桓靈，黨錮之禍如蝟興。
海內英賢被名誤，枉死不獨滂與膺。

卷三十三
君名當世良不薄，角巾折亦人爭學。胡爲明哲獨全身，
黃鵠高飛能寥廓。我欲起君一問之，九原邈矣將奚爲。
青山亦復不能語，三復扼腕空遐思。

孝義有感

明魏綸

薄宦觀風日，蕭條歲暮天。空林巢鳥露，遠岫凍雲懸。
草沒文侯墓，冰堅孝子川。自慚叨國祿，行役又經年。

立秋日遊東觀課應試諸生

明劉有誠

宿雨濛濛暑欲收，肩輿不爲訪丹邱。文昌昨夜輝三晉，
才子同時第一流。逼眼槐花忙驥足，報秋桐葉過樓頭。

熙朝幸際唐虞世勲業誰當禹稷儔

薛頤晚照

明張冕

一聲殘角又黃昏無數牛羊遠近村十里平川生暮色
半邊林影入柴門人爭問渡呼舟急鳥欲棲巢向樹喧
遙望幽巖深翠裏孤鐘隱隱出祇園

題林宗祠

明蕭啟

暫停車馬謁荒祠高節清風想昔時明哲獨能逃漢黨
人亡誰解慟周詩斷碑零落藏榛莽古墓荒涼近路岐
英爽若存應識我生芻莫訝莫來遲

窮民歎

明王文清

戊辰中秋同友人觀月而歸見閭巷有窮民向月
悲楚者因感而作

乾坤萬里湧金波。碧霄滄海影婆娑。何秋不見光皎潔。
何人不見清冰雪。或捲蝦鬚。殿鶴軒。或封蝸寶處。鳶蹲。
或漱蟾晶。喜炎息。或畏冰鏡。愁寒織。或奏雲璈。簇管絃。
或泣露葉。血涕漣。非是天月有悲歡。貧人難與富人般。
貧人屋上非無月。貧人骨中髓已竭。種蠶全家無一絲。
種穀終日無半炊。得錢數緡遣一女。得粟數斛賣一子。
子女仳離腸欲絕。吏債追呼心滴血。春夏蚩蚩盼秋期。
秋期怕見月上時。四壁磬懸寒徹骨。殘魄亦照窮愁窟。

啼鳥啞啞鼓角秋。鳴蜩噤噤鬢髮颺。梧葉柳林朝墜葉。
夢魂擾擾如欲死。慘淡蜉蝣和爾爲。閉門椎爾淚平湄。
今生願祝中秋月。照破窮愁四海歌。

白馬仙洞禱雨

明許天球

春郊聯轡訪仙蹤。洞口桃花色正濃。白馬已隨黃鶴遠。
蒼虹猶見紫苔封。重巒殿古懸雲榻。絕澗崖空瀉石淙。
爲報山靈元應禱。甘霖時霈慰三農。

過永寧

明李邦彥

匹馬來過舊石州。荒城殘壘暮堪愁。哭聲尙逐風聲咽。
兵氣猶兼厲氣浮。三晉黎民多北走。千山白骨未全收。

何時得掃烟塵靖共向光天化日遊

次平遙夜望

明韓邦奇

漠漠荒城署飄飄旅笛哀坐看寒燭盡愁絕夜更催冀
北花爭發塞西鴈不來歲華容易改春盡且塵埃

尹吉甫墓

明韓邦奇

瞻仰周卿士淒其古墓門苔荒啼鳥跡草沒斷碑痕俎
豆千秋遠儀型百世尊空留臺畔月常照此乾坤

讀壁間端溪韻有懷

明韓邦奇

不見端溪十四載江南塞北日相思郵亭此夜無窮意
對月遙看壁上詩

孝義謁孔廟遇雨 明韓邦奇

星門侵曉闕，化雨向春滋。
鳥雀喧壇樹，蛟龍起泮池。
衣冠三晉士，道德萬年師。
獨愧觀風使，無能荅盛時。

抱腹巖 明韓邦奇

崔巍峻嶺與雲連，梵刹宏開際碧天。
佛殿有風金鐸響，石巖無雨綵旛懸。
優曇砌上花香馥，祇樹林中鳥性禪。
信是空王有靈異，祥光絢耀起前川。

題介郭 明馬卿

林宗不絕俗，介子固深逃。
秉心各自潔，夷惠豈殊操。
嗟我尙縻祿，憂思日夜勞。
終然慕高爵，長揖過林臯。

謁有道祠

明胡漢

先生出處漢人豪，半畝祠堂半野蒿。
古木寒鴉棲未穩，霜清天濶月輪高。

由關子嶺發兵入綿上

明高叔嗣

戎衣曾事主，羽檄日徵軍。
敢奮一朝畫，而邀百戰勲。
深山連古木，落日斷黃雲。
愁思荒村夕，誅求不忍聞。

十一月朔孝義道中

明高叔嗣

山城風物歲將闌，行縣初因問俗安。
授歷漫驚違一載，趨朝尚計逐千官。
煙鐘動闕天微曙，火樹薰庭夜不寒。
久忝恩私今始悟，簿書催急驛程難。

試府學寧鄉兩學諸生明倫堂 明文翔鳳

巴蜀規王者西河疑聖人荆州既持論終亦謬稱臣從
來多自大不免笑洪鈞龜茲應非馬匍匐壽陵塵夜郎
休擬漢禹圖曠無垠六經續王氏雅志抗千鈞庶門談
禮樂雍雍在河汾仇董將無福顏冉未堪倫姚薛成中
說輒以當泗濱遂被吳楚誚壯夫挂志瞋吾道歸位聖
如奉斗樞尊羽儀方端木九江苔濫淫忝膺教化主廣
大括一元堂端危獬豸代野括麒麟誓以天人力破茲
歷劫昏長庚舉右幟犬丙推輕輪一戰清江湖再戰踰
崑崙奇書收羣玉明珠采大秦希聖稱良宰絕筆贊獲

麟文學匪具眼言語聊激昏卜山一抔土甘爲魏侯藩
願曳垂雲采八紘掩俊民彌天兼四海釋習眇羊羣

巡西河見兩學諸生郊迎輶軒有句書以示之

明文翔鳳

子佩青於千樹柳帳紗紅是半天霞桃花水翠又湖錦
蘋末風還后土家電影欲飛登座舌帝鄉新到借書車
吾將促發陽春箭坐督烟香入露華

西河建衡文臺告成予以上春十三日初蒞喜賦

嬰鳳

乍見文昌第一宮梁抱飛電礎盤虹僊靈拱手紅雲握
星座垂光綠玉瞳春借錦毫千氣色運憑神力破鴻濛
誰能斂冠三千士蚤攬青天繼聖功

題林宗

明 蕪 舜 澤

高張琴絕絃，暗投珠委路。嗟哉東都士，禍樞踵危步。穆
穆郭林宗，深心托幽素。含章貞自抱，誠微幾早悟。仙舟
聊可並，墮甕豈堪顧。懿彼烝民章，明哲伊誰賦。

秋月登石樓山

明 李 瀚

倚醉尋殘壁，拂雲認舊題。林扉秋色早，山崦夕陽低。白
髮雙吟屐，清風一杖藜。興來還履險，疑是躡丹梯。

閱士西河值久旱喜霖雨沾渥漫賦二律步壁間文

太青先生韻

明 吳 時 亮

教衍河汾聖澤賒，人文蔚起赤城霞。薰風徧洽凌霄士，

甘澍挖敷望歲家應識詞源能倒峽敢云化雨卽隨車
滄溟波湧神魚躍會看文湖翻浪華

森森桃李晉陽宮劍倚青天氣吐虹燭漢奎光絢五色
連城寶焰徧雙瞳望慚韓斗雲霞迴澤借商霖煙霧濛
藝苑漫誇香雨潤滋培玉樹摠神功

登南山寺有感

明王守履

尋幽覓景好從吾茶命僧烹酒屬沽舉足心常防錯誤
登山路不畏崎嶇摩霄松柏風霜古傍月禪林世界殊
羽檄忽傳頻悵望朝天何策獻奇謀

過林宗墓

明黃洪見

角巾吹折憶王孫。出使星輜過古墳。汾水魚龍閒白晝。
漢家宮殿正黃昏。保身暗識高賢恨。駢首誰招黨錮魂。
千載精靈何處是。鶴鳴華表夜深聞。

弔子推祠

明楊巍

每於青史想高風。故里經過悵望中。欲弔當時栖隱處。
滿山殘樹夕陽紅。

源泉

明王一魁

縣治東南三十里有泉出山下。名源泉。蓋卽酈道元
縣山石洞水也。泉分東中西三河。余爲濬渠均流。
溉田萬畝。且著約束。以息爭端。民甚便之。又改建

源神祠宇祠前起樓曰鳴玉又構軒左右曰趨稼
三河北去是橫汾目極平川幾派分遠岫連天都入畫
回風吹浪動成文決渠競注瀟湘雨奮錘俄興觸石雲
爲問田家何事業休將游惰悞耕耘

倚山樓閣鬱崔嵬蜃氣疑從海上來入檻泉聲鳴珮玉
當簷樹影落罇罍將雛野雉高還下驅犢農人去復迴
欲向秋風重寓目離離禾黍繡成堆

長春觀

明鄭柏齡

烟霄開紫閣雲日亂青林怪石臨流淺幽花入院深
紫迴盤水曲迢遞俯岩陰爲愛山源好春來幾度尋

汾上夜歸

明張邦奇

一篙烟水碧潺湲，幾片秋雲度遠山。
最愛白蘋洲上月，夜深常送釣船還。

住持天寧寺

明釋妙總

語言全不滯，高涉祖師蹤。
夜坐連雲石，春栽帶雪松。
鏡明金殿冷，山蒼月樓鐘。
有問西來意，虛堂對遠峰。

半癡

明徐渭

小鳥形半於雉，名半翅癡而易襲。
又名半癡，縣山多有之。

厄與癡相半，禽將鼠共縣。

上谷人與黃鼠共稱

味雖供客好，名却

使人憐所下惟雙筍何妨少一拳如聞三嗅叟笑殺雉
莫筵

督家僮築場

明朱慎錡

露墜聞秋氣原田已漸黃夕陽西嶺下暝色遠邨涼爾
輩宜乘月將鋤好築場蟲吟聲在草切莫誤相傷

過屏風山

明王鳳翼

天外屏山類削成葱籠佳氣接孤城松蟠鳥道侵雲直
水遶羊腸徹澗清騷客揮毫堪作賦仙翁跨鶴欲吹笙
深林不見樵蘇者絕頂風過短笛聲

汾州府志卷之三十四

藝文八

與胡處士庭訪北齊碑

顧炎武

春蘿亂青山，卉木苞未吐。繞郭號荒雞，中田散野鼠。策杖向郊坰，幽人在巖戶。未達隱者心，聊進蒼生語。一自永嘉來，神州久無主。十姓迭興亡，高光竟何許。棲棲世事迫，草草朋儕聚。相與讀殘碑，含愁弔今古。

子德自燕中歸省我於汾州天寧寺

顧炎武

一載燕臺別，頻承注問書。天空烏鳥去，秋到鴈行初。共識斑衣重，偏憐皂帽疎。輕身騎款段，一徑訪樵漁。

過郭林宗墓

顧炎武

路畔纍纍墓石多，中郎遺愧定如何。
應憐此日知名士，到死猶穿吉莫鞵。

介休

顧炎武

淡靄生巖際，奔泉下石間。
龍蛇方起陸，雀鼠尚爭山。
雨靜前邨市，秋凋故國顏。
介君祠廟在，風義負難攀。

冬至寓汾州之陽城里中尉敏浮家祭畢而飲有作

顧炎武

歲時常祭祀，朝夕自饗殮。
尙是先人祚，誰非故國恩。
枯畦殘宿雪，凍樹出初暾。
奠醊求何所，鄰家借小園。

流離踰二紀，愴悅歷三都。墮甑煤還拾，承槽酒旋沽。荒
庭依老檜，空谷遺生芻。白髮偕宗叟，相看道不孤。
王孫猶自給一頃，豆萁田今日還相飯。千秋共爾憐青
門餘地窄，白社舊交偏。傳與兒曹記，無忘漢臘年。

嘲松 胡庭

汾俗正月斬松枝，植門前或編花朵其上，夜炷香
苞中。

誰向石橋畔，移來金谷園。陰濃連上苑，跨據近通津。散
子叨佳饌，分枝占艷春。遨遊游冶客，鑒賞老山人。解與
歸僧佞，曾爲社鼠鄰。卑睇梅竹友，貴挾虎狼秦。巢頂鴟

泉滿乘涼大疑頻。晦冥藏魍魎交互長。荆榛夜黑啼風
雨。秋空詫鬼神。籠雲深蔽日。攀葛遠聯姻。竅竅號天籟。
時時墜暗塵。高低香饋送。南北鳥逢迎。直作千年計。長
存百尺身。會無滄海固。太認棟梁真。粉蝨俄爭蝕。條枚
不重新。焦枯拳蜩縮。垢膩宿龍囷。望影堪加望。批根欲
錯薪。甘棠猶剪伐。切莫怨洪鈞。

向陽道中

胡庭

曲折向陽道。遙瞻路渺茫。形從驢背子。泉逐佩聲長。鳥
道繁花覆。人烟古樹蒼。嗒然回首處。落日半山黃。

望縣上忌坂作

王士禛

南望介休郭青山鬱相嚮爲問斯何山云是古縣上子
推從亡返託迹此巖嶂公子詎烏喙斯人自遐尙既殊
少伯逃復異靈均放焚林良已奇抱樹或過當疇知志
士心未易恒情量誰代歌龍蛇其迹類有望棲隱儻不
終懼爲高人謗田光齒利劍瀕水沒清浪所貴明一心
何能畏死喪嗟彼苟且人浮沈詎爲曠

介山 王士正

驅車縣上聚懷古縣上田授璧事已遠遺跡今虛傳晉
國昔多難公子寔大賢五蛇爲之輔一蛇獨耆乾身隱
竟焉文狐趙羞比肩逃榮誼固高報德理亦然徘徊望

忌坂落日無寒煙何人貪天功嗟哉南內年

郭有道墓

王士正

大槐坂上逐車塵爭效先生折角巾至竟清流解亡國
望門投止是何人

謁文忠烈公祠

王士正

精神如破貝州時晚節猶能動四夷天遣不同韓富沒
姓名留寇黨人碑

送張劭之平遙

朱彝尊

彼汾沮洳吾舊遊送爾匹馬逾徐溝人行芳草碧於水
日出杏花紅滿樓楹中酒味苦桑落簾外鳥聲黃栗留

客居適意遠亦得。搖筆題詩何所求。

介山石乳泉

傅山

佛恩滋靜者。石乳勅龍潭。菡萏瓊茹引。摩尼玉線甘。惠該功德八。清徹法身三。三兮醍醐足。那伽不許貪。

三道河

傅山

三道河邊春可憐。桃花一曲起紅烟。老夫不解先生樂。日日偷閑學少年。

柏窰山四首

傅山

今秋何秋兮。乃從河之涯。物外三四人。帶情聊烟霞。灌薄得霜早。蒼翠紅紛拏。嫵媚領南國。睥睨摘幽花。言言

語語而行行來柏窠

翠柏爐幽整細雨騰秋香柏根轆轤罅雲根函一牕
老人忌清薄朝嗽散林光俯批綠影入石房殊不涼
坐久神氣和探書有蒙莊林邱之所美先令靜慧生
礪礪出菑菑可以弄文章

前窠多茂柏後窠復松林既無樵蘇擾亦鮮羶葷尋
高步取微徑香綠滴素襟牕外有虎跡牕中冥坐吟
彪炳此畏友總勝奴子臨

大石任坐卧古蘚天花茵何處能喪我入林卽外身
親知時時至相感獨晨昏

端陽後一日同高春元王監元重遊牙嶺寺

王之儀

綠醞青尊過楚宮
淡雲疎雨散長空
花香隔樹紅千朶
草色浮烟翠幾叢
見慣自甘野鳥狎
飲豪獨與故人同
歸來牙嶺峯頭月
已背禪林返照東

孟門洪濤

梁棟

孟門西向瞰秦京
萬丈蒼山鐵削成
日暮寒鴉啼古樹
夜深殘月照孤城
導開積石河從軌
崩落梁山水逆行
未闢龍門真個險
商家曾此借藩屏

行次孟門

高首標

春日儘憑弔
輕鞭指孟門
望烟迷舊堞
穿樹見孤村
積

翠來山色迴濤咽水痕疇柔千幹潤岸柳一天蕃辨籀
尋荒碣漱醪愛木樽俗甘耕鑿味人絕市城論坐久看
雲行遲聽鳥喧避煩堪憇此何必問桃源

題栢山廣濟寺

辛東山

屏山城郭水雲鄉沙磧孤村度柳行巒嶂曉晴天漠漠
人烟日落樹蒼蒼兵戈阻絕終年險鎖鑰清嚴此道長
問俗開襟延故老白頭爲我見鴻荒

老松歌

顧崧

西山啣日日欲落潏溪萬派生波濤鏗鏘鏗輅發異響
九天何處吹雲璈卽而聽之聲在樹虬姿偃蓋松風號

離奇天矯一百尺，雪幹霜稜金石牢。下有伏靈之精，上有仙露之膏。蒼龍叫虎豹，隼鶴舞燕雀。逃風雷相護，神霧扶干霄。蔽日聲勢高，吁嗟乎！胡爲蕪沒于荒崖絕壑之間，徒令人徘徊瞻眺而蕭騷。

離石行 顧嵒

離石離石，蚕叢道插天峯頂。田星羅農夫腰鎌，插禾黍耕雲鋤。月何差哉！比年赤龍煽虐來，青霜肅殺降奇災。夏麥枯槁，秋稼傷黃鳥驚飛中澤哀。黎民子遺滿路衢，兒別爺娘妻別夫。斗粟貫錢隨人走，烟鬟霧鬢啼嗚嗚。村落八九長荆杞，雞狗無聲鳥雀死。黃狐直立官道旁。

白狼跳梁入城市，吁嗟造物何不仁。繪圖發粟徒苦辛，天王自聖大官法。燮理無狀在微臣。

夜聞城外澗聲 顧峽

白晝不聞聲，潺湲入夜鳴。隨鐘度遠岫，和月到孤城。濤起松翻雨，響沉茶沸鎗。頗諧山水癖，塵夢一時清。

再之茶亭道中 顧峽

行役亦已慣，荒山一倍遙。斷崖誰補石，亂水不安橋。馬畏霜蹄澁，鳥驚春樹凋。老夫嗟況瘁，空自羨漁樵。見慣仍聞事，行吟聊一題。松梢欹老鶴，石齒漱寒溪。巖古蘚都黑，谿深逕轉迷。居人樂故土，老稚自提携。

屏山樓和韻 顧崧

阿誰經始費誅茅東面樓成瞰遠郊
萬嶺雲霞生屋角千家烟火出松梢
石衝野澗喧微浪木落寒鴉露舊巢
吏隱居然塵外致移文不用更相嘲

師莊道上 顧崧

萬山稠疊隱孤城澗水西流活活鳴
野寺峯坳樵路細荒村石罅爨烟橫
境鄰邊塞征難緩歲隕嚴霜稼未成
慚愧斯民猶古道壺漿簞食有逢迎

卽事 顧崧

救荒無策實堪嗟鏡裏朝朝添鬢華
家室化離悲滿目

春風猶放女郎花。

山城春色又平分。無那愁心欲望雲。花柳寒深渾未見。
江南紅雨落紛紛。

校士西河時方憂旱忽降甘霖喜賦二律和文太青

先生石刻原韻

李觀光

半載馳驅道里賒。甫來石室想煙霞。時當蒲木紛千畝。
雨足田疇樂萬家。自信此心爭似水。漫言甘澍好隨車。
論文且喜消炎熱。擬向郊原攬物華。

芹藻方思樂泮宮。更看化雨吐長虹。懸知潤物資蒼昊。
何事尋仙問紺瞳。載酒鶯啼聞曉曉。插秧人滿滴空濛。

逢斗況有蠲租詔鼓腹羣黎頌

聖功

之寧鄉所治紀事述懷三十韻

呂履恒

攬轡雞鳴候之官鳥道邊漢家離石地禹貢冀州田下
下難分壤高高欲上天峽花邨舍隱嶺樹縣城懸驛路
綠沙磧關門鎖澗泉三家忻市集一木畏橋巔晉趙多
征戰河山屢破全妖星躔彗孛野日耀戈鋌谷沓黃巾
聚峯高赤幟塞耕牛充犒餉牧馬躡圍廛況乃因饑饉
如何歷歲年鬻妻艱易米質產怯增錢黑嶺春添戍黃
河夜捉船雨昏明鬼燐睛眺絕人烟往昔民耗矣登臨
意悵然壘培餘土在陶穴幾家延山荳稀仍發墳松斷

復連燕巢依木作鱗乳入村眠氓業應思復官階敢望
遷微名遭盛代深意附高賢未種河陽樹遑揮單父
絃行觀新麥隴卧弛舊蒲鞭退食簷雲落移牀牖月圓
竹聲清響勁槐葉冷淘鮮蜡祭時迎虎遺風有獻新祀
崇民藉鑒俗樸吏忘權祝聖聞歌壤經時感濟川
風雲銷赤手日月去華巔冉冉侵衰甚悁悁逼恨牽祈
年希道泰天地荷陶甄

祈雨行

呂履恒

雲者風所讐見之則震怒不惜吹雲去孤日其誰與雨
能青我苗風能赭我土我土氣力薄歲豐拾斗許沙虐

裹石骨耕鐵茹復吐官租月以分率半十之五婦媼子
懷抱十五亦何取入城視長吏飲水祈甘雨甘雨不可
得鄧錙器壇所

坤元宮雙松歌

呂履恒

雙松東西互爲友丹楹粉壁江聲走枝幹排雲入窈冥
萌蘖不知何代有東株倚戶半敲斜滿身苔蘚生霜華
雷霆忽起蛟龍怒掀翻鱗甲張爪牙有時風靜日移晷
青陰覆殿涼於水元氣茫茫混太清幽叢寂寂棲神鬼
近西一株獨正直亭亭上出千峯碧流膏入地似黃金
偃蓋扶天蕩白日主人延客坐其側舉杯不飲皆自得

與君同結歲寒心。隨天自布陽春澤。嗟哉雙松的的有根株。哀今之人似此無。

屏風山

呂履恒

一徑通林幄。千崖厰石屏。瀑聲紛積雪。日氣漾空青。獨立高雲表。羣瞻太古形。不知真宰意。鏤削待誰銘。情移忽黯澹。車轉自低徊。勝地無終極。何人見始開。中巖環日月。衆竅吐風雷。欲問樵夫徑。松聲隔磔來。

雲棲嶺感賦

呂履恒

天畔羣山勢不平。登高欲賦客心驚。松巖雨細猿寒嘯。花谷雲深鳥暗鳴。水碓曠餘惟草宅。火田兵後少人耕。

幾時村落還成聚，兼遂林泉吏隱情。

秋日寧鄉關有感 呂履恒

宿靄幽林曉自昏，晚花殘照更銷魂。
秋山雁度黃雲嶺，古戍人歸白石村。
宦況清華惟水木，農功寒雨爲蓰殮。
停車陌上詢田父，舊里千家幾復存。

黑坡廢村有復業者喜而賦其事 呂履恒

數椽茅屋萬松間，一帶新疇是故山。
慚媿鶉衣和淚說，餘生今爲使君還。

田婦朝饔汲石潭，山花持采已盈簪。
烹來土釜無香茗，坐對松巖飲亦甘。

山菌新鮮獻乃公，草間長跪捧筠籠。
憐渠雨嶠霜林裏，念我清齋孤署中。

石田新闢雨初收，女媧男耘正麥秋。
傳語吏人休駐馬，恐驚雞犬入林邱。

石州道中

呂履恒

白日下汾曲，清秋宜遠行。
泉經山店引，烟望驛樓生。
背嶺人聲接，刊林鳥道平。
亂餘初買犢，逋賦賴深耕。

離石雙松歌

呂履恒

離石西南林壑奇，兩松離立皆殊姿。
大者勁挺百八外，雷雨恍忽生虬枝。
其一東偏勢尤古，攫拏偃蓋蟠蛟螭。

黛色半浮巖岫出蒼鱗欲混青冥移高齋短壙在阿堵
暇日緩步相追隨吾兄爲政多餘閒減騶撤蓋攜餅卮
盛夏山城朋好稀獨與兩松結心知晴風舒卷微濤生
謾謾過耳塵襟披其時日夕山氣佳樓臺倒景何參差
造物豈供耳目玩霸根疑有神鬼持香臺盡亞山殿冷
颯然如在涼秋時摩娑欲去還復留酒酣爲作雙松詩

夏日遊栢窰山卽事

呂謙恒

首夏氣清和凌晨訪薜蘿仰窺空碧小坐挹野芳多騶
從無塵事壺觴有嘯歌石房題字滿處士舊羊何

李陵墓

梁杰

雲中憶上望鄉臺。黃沙極目迷龍堆。落日邊城胡笳動。
但聞牧馬鳴聲哀。將軍賁志忽以沒。不勝憑弔獨徘徊。
君不見鞬汗山下戰鼓絕。成安一死早自裁。又不見李
緒教兵爲謀主。單于用事無相猜。故人數把刀環示。
曷不屑意同歸來。徒欲得當報于漢曹沫。七首安在哉。
生既莫望關門入。何處魂從故國回。汾水深深。縣山崔
崔。地下孤城骨應朽。愁雲終古鬱未開。韓嶺土三尺。介休
樹幾枝。由來多感喟。寧獨少卿才。嗚呼。只今鄉人作寒
食。乾粥猶能祀子推。

賈侯廟

梁杰

表裏維藩地。緣邊偏五戎。當途失其馭。分部分西東。劫
運屬典午。妖魚兆夢熊。本非池內物。況假之而風。一旦
遭反噬。郡邑鮮完壙。爰茲彈丸土。四面圍梯輶。侯竭捍
禦力。城亡身與從。矢志豈苟活。堪笑賊將崧。允矣史臣
贊。方搃美勁松。曾謁睢陽廟。勒馬弔雙忠。靈旗颯颯動。
侍衛森且雄。每當春秋社。簫鼓奏明宮。雞豚爭報賽。豈
但慶年豐。維侯流澤遠。庶烈先後同。隱作山河氣。長扶
社稷功。至今蒙保障。列戍靖邊烽。

上光岩寺

董柴

隱現光岩寺。林深徑自通。山僧逢谷口。野鳥下雲中。涼

借十峰雨秋生一樹風南樓高敞處塵慮滌教空

謁有道祠

董柴

偶來東郭外繫馬謁先民高蔭槐猶古遺碑篆又新一
身超黨錮千載表人倫細雨祠前暮臨風想墊巾

超山西莊

劉嶠

西莊連一山澗水割東西鑿石穴居隱列樹學巢棲種
禾高山巔汲水下深溪谷轉人不見但聞午時鷄巔上
松如蓋孤煙與之齊欲捫藤蘿徑不得通輪蹄

超山

劉嶠

一片超山色連天翠欲浮浹旬常入夢今日始來遊攀

樹晴雲豁沿花曲澗幽鶯聲三十里速客遍枝頭
紫葢臨深澗扶筇欲上難低徊綠石磴矯首忽雲端天
闊諸峯小風高五月寒細尋幽勝處引入坐中看

謁梁萬戶墓呈康大太乙

劉嶠

大元文物訪平遙繫馬荒墳石象牢綠水長鳴嬰澗細
青山不改麓臺高英雄事業埋蒿里松雪風流見鳳毛
梁墓碑趙子昂楷書五百餘年誰呵護好憑金管起人豪

登麓臺山

劉嶠

煙樹天邊度幾村青山萬疊麓臺尊下方城市渾無見
一片雲飛出雁門

汾州府志

卷三十四

藝文

三

麓臺山歸劉岫

拾得白雲馬上行，千山萬壑向重城。
歸來夜半寒窗下，猶聽松濤作雨聲。

栢仙觀古栢歌

王綬

平陶十里西南行，栢仙之觀明朱甍。
樵牧不至剪伐少，老栢得壽以仙名。
瞥見蒼翠浮天際，近身拔地起復傾。
磊砢盤挐幾千尺，鬱曲剝蝕癰而清。
本根數人圍不得，分支參錯猶弟兄。
一支北頭挺然立，扶疎柯葉垂繁纓。
次東鐵幹勢欹側，欲趨未趨還力撐。
次南瘦削如髯叟，羽騎鶴髦調吹笙。
廣成偃佺呼欲下，岸幘磅礴饒縱橫。

就中青銅蕩白日。聯絡行列如有情。最奇老蛟西騰走。
鬐鬣戟張神魂驚。五丁力士不可挽。攫挐奮怒凌高閭。
風雷震動儼回顧。鬼廷彷彿靈虬聲。奇姿異狀絕不類。
仙邪栢邪難區評。超山俗吏對之飲。徘徊一酌嬰瘤觥。
大冬嚴寒未彫改。暑伏白晝移陰晴。甘子落堦盈道氣。
香脂自服已長生。天齊地等閔人代。泰和柱石直孩嬰。
一形仙化今如此。荒唐秦漢疇定衡。吾聞孔明廟前栢。
霜皮黛色非凡英。螻蟻鸞鳳杜陵句。愛惜奚啻錦官城。
又非荊州與新甫。詩書名號徒喧轟。土衰木盛爾何意。
支離偃仰同老僮。真率無言長穆穆。洪蒙不鑿全幽貞。

巴東兩株亦千秋。栢仙栢仙吾欲從爾蓬山瀛海訪飛瓊。

劉思齋游麓臺山以記見示并錄壁間張中宿先生詩步原韻卽呈太乙思齋王綬

麓臺青峭白雲頭。杖策高閑羨此游。石起疊峰何處是。嬰常名澗客初留。飲看萬壑千岩記。幾上城南縣北樓。失却龐公存守黑。壁間題句細凝眸。

超山幽居釋際得

雨過千林霽。開窓坐翠微。蟬鳴孤樹靜。鳥啄落花肥。白日催人老。青山到客稀。誰能同寂寞。身世兩忘機。

名藍繞占跡泉石足怡情
幔卷雲山色厨分澗水聲
蒼煙樹碧漠漠遠川平
麥老桑空處農忙帶雨耕

夢餐優曇花作

于成龍

余讀書山寺時夢餐優鉢羅花卽吟一句詩仙人
賜我鉢羅花醒語純天和尙

卽性善

檢藏乃知鉢羅

花卽優曇花也因賦以誌

優曇會記夢中餐山寺日高栢水寒雲繞佛龕常五色
香飄精舍比芝蘭生平不識金銀氣偶雨輕拋麋鹿灘
四十年來摩障盡好教拂袖紫霞端

黃河古渡

朱紹鳳

天地何年老。勞人半渡頭。浮梁隨逝水。斷岸落殘猿。
嘯秋風急。馬嘶曉月愁。爭如牛背上。閒欲看東流。

弔八將軍 顧凌霄

將軍玉牒出天潢。不許貲財齎盜糧。舌在豈能摧魯國。
膝強誰敢屈睢陽。早知國破家何惜。轉恨宗殘命合亡。
折頸裂冠悲獨慘。幽魂白可報高皇。

弔馮生 顧凌霄

儒林義勇寔堪推。守策津津數出奇。壯志未酬身土壤。
忠魂有淚哭城隍。雖無鴻績垂青史。自可蜚聲勒口碑。
宿草一抔長寂寞。令人空憶舊容儀。

介休道中大雪用歐公字體并次其韻 周在浚

縣山翠嶺開蓮幕。雨來怪底雲氣薄。曉來羈馬欲出戶。
颯颯風聲忽大作。蒼崖不復辨狐岐。林宗祠前莽寥廓。
手縮難縮紫遊韁。目眩但覺光閃爍。沿村沽酒苦酸澁。
敲門乞火嗟冷落。胡爲歲歲勞行役。老我不如邱中貉。
聞道此邦春夏旱。棄兒拋婦隨人攫。道傍尙自多流亡。
慘傷半似依人雀。馬凍不前惟長嘶。僕餓急走遺芒屨。
忽逢年少披貂裘。豪興但誇逐兔樂。執手不暇問姓名。
金盃行酒恣傾瀾。擊鮮聊復慰老饕。最喜乾坤歸淡漠。
一時頓忘行路難。掌熱儘堪握冰撈。搖鞭我亦急馳去。

面首相看各狂噓

郭林宗祠下觀傳青主鄭谷口重書蔡中郎二碑歌

用少陵李潮八分小篆歌韻

周在浚

軒頡文字不可見金石之刻融殘雲劫灰之後若瓊寶
西漢以來珍八分歐趙當時已嘆息後之寶者誰爲真
太原傅山筆力健以意摹寫多丰神我友鄭八號稽古
秦碑漢碣身相親當時客都下硯山孫退谷少宰曾卜鄰石
經遺字數晨夕寢斯食斯如對當時人重爲臨摹儼然
和祠中兩兩同西向波撇矯健俗書遠興來老腕休屈
強中郎之文無慚容谷口之字多雄壯千載萬載難磨

石傳鄭今時李郭行我來坐其下摩挲還作歌碑乎碑
乎從此流傳歲月不可紀風風雨雨柰此貞珉何

過有道祠見公他書中郎舊誄歎美不已因紀以詩
吳雯

繫馬古槐下槐花石堂偏誰書有道碑古法蛟龍纏其
文中郎舊書亦堪比肩嗟哉濁堂老縱橫照秋煙鴻都
蹟久蕪幃幕留殘鏤夏承誰呵護靈光猶巋然巍巍九
疑頌託迹於神仙此碑妙接武絕響續千年梁鵠鄙不
爲頡籀或後先我來重歎息典型欣目前坐卧欲三日
苦被塵累牽上馬再回首孤鵬方高騫

麓臺龍洞

陳祖法

逶迤入洞口，衣帶盡寒色。竦身入深邃，亂雲千里黑。四
洞各離奇，儼然如分域。北麓地最崇，潛龍爲窟宅。古木
橫深澗，危梁俯空碧。稍南聯二穴，水乳交凝滴。龍孫與
潤濟，據之司霖澤。東南更深窅，腥風朝暮迫。日沒萬鬼
號，雨來千弩集。奔雷與噴霧，鴻濛終古闢。茫然驚飛鳥，
何從振杖策。緬想月上時，皎皎照寒栗。猛將擁嬌娥，新
花附古栢。

將歸渭南留別方明府樵舟

雷曰鑑

驚魂初定復何之，春水柴門繫夢思。最是陳遵能好客，

幾番投轄遲歸期

官齋寢食動經年一曲驪歌著短鞭回首魏城斜日外
落花如霰柳如煙

平情讞獄信如神百里甘棠夾去津勒馬風前頻慰語
官箴最好是清貧

龍山書懷 釋德睿

深秋林木間青黃嘹唳南飛雁影涼二十年餘離漢水
三千里外滯中陽樓頭玉笛他山月溪上蘆花野店霜
差喜此身猶未老一肩瓢笠返江鄉

過穴居卽事

吳嵩允

茅穴依然古帝民。石田可稔未爲貧。膝頭舉步應憐汝。
敢耀冠裳學貴人。

弔八將軍

劉文德

敢咲金符肘後懸。天家義武勝戎旃。虎鬚盜跖驕鴟吻。
龍種王孫泣杜鵑。絲粟空筭膝有鐵。風雷交口刃無權。
長爲秦楚舒悲嘯。貫日虹飛憤始宣。

弔楊生

劉文德

浩然士氣凜難移。耻作圜人逐亂離。慷慨特歸蠻序死。
衣冠還付井泉知。忠魂兩夜重閨夢。信史千秋一乞兒。
已從容猶不免。鰕生亮節最關時。

憶山寺舊遊 劉元錫

環山皆古栢，繞逕盡蒼苔。峯插青霄上，花開綠水隈。
曉煙迷雉堞，月色淨蓮臺。山有安國王城並蓮花石記得逢僧話，禪機觸處開。

庚戌五月十有三日，署內隙地露難民骷髏三百零
余立塚瘞埋，置田設祀，同諸公分韻弔之。袁學謨
聞說明時被賊攻，石樓最慘血流紅。嶙嶙白骨埋荒草，
盡是英雄節義躬。

經郭有道宅 袁學謨

西河高士昔稱仙，蓬蓽餘暉別一天。剪韭只知延上客，

窮經不厭鑄羣賢龍歸溟海雲霞淨鳳隱丹邱毛羽全
漢代英雄今已矣寒鴉猶噪舊廬邊

南州孺子慕高賢遠送清風一榻懸鈞黨不逢藏石室
角巾無恙濯靈泉空庭皓月留餘照匝徑黃花繞暮烟
莫道遐飛鴻未杳羨君茅屋白雲邊

先生故址傍雲阡禾黍離離鶴唳天勝蹟空留殘碣篆
孤芳時帶夕陽烟霜侵老樹風還古秋滿荒臺月尙圓
今日訪仙蹤跡遠桃花洞口色依然

汾陽官署秋夜

周于韓

羈旅西河日高秋晚眺時涼風入幕早孤月到窓遲簾

靜琴餘韻機忘鶴欲隨東山何處是南雁去參差

金鎖關 邢秉誠

地險雄金鎖天工勝玉關兩崖巖勢敵一逕騎行艱荆
棘攢千疊嵯峨扼萬山昇平嚴戒少障塞亦常閒

游筆架山次白玉蟾韻 釋性善

白雲隱沒舊山家活計甜齋與苦茶睡起不知入世事
石臺講罷落天花

弔晉太子耶律妃墓四絕墓在城南二里許俗稱淨
梵王太子妃者可發大嘆且勝佛矣詩並正之 康
乃心

鏡奩何代掩荒邱。瑤瑟玉簫出鳳樓。一自故宮人去後，
年年煙雨泣深秋。

琉璃碧瓦照蒼苔。猶似鸞車寶扇開。妙麗夫人應有相，
故教金粟傍如來。

晉國山河一夢移。君恩如舊鴈鴻知。於今墓栢青青在，
黛色長留夜月時。

一枕千年向此中。山邨麥飯冷春風。憑他浪說西天話，
三月桃花滿院紅。

哭于北溟總制

魏象樞

簡命深叨。聖主知臣心。精白縈無私。清風亮節高千

古吏治民生濟一時寢食難忘宸翰重死生未報
賜金慈巖疆賴有斯人在何事驚傳箕尾騎
生與同庚性不殊居然三晉兩迂儒憐君盤錯身先瘁
顧我膏肓病未蘇南望江河誰復挽北瞻雲日總難呼
當年薦草曾聞否歷盡平生一語無

金鎖關

周超

一雙峭壁插天起崢嶸勁敵相對峙朶朶巉石色穿雲
勢欲壓覆行人悸萬株矮樹棘成叢互嵌迸裂根玲瓏
犬牙鹿角爭萬狀罅漏一綫窺青空吾送王師亦策
蹇過此馬首勒莫轉層岡疊嶂扼咽喉百轍千途總不

舛三晉雄圖左太行黃蘆右度通秦疆廻環崩劣不勝
數飛泉屈曲奔向陽南接狐岐北彪嶺汾石兩分內外
屏世平則玩久則弛自昔秋防最嚴整漢晉歷代巡邏
制專屯要害訐奸宄控弦帶甲六十名斤墩延袤三十
里嗟今山勢空崔巍王公設險安在哉原非五丁巨斧
劈障塞無煩管鑰開王道本貴蕩平路唐虞豈恃山谿
阻謀國苟非兵食足總有天險亦不固君不見秦地崇
關一百二沛公先入誰能禦又不見萬仞劍閣蜀門戶
奉璽降王問何故但聞嘉隆兵氛來偏頭直抵汾城隈
俄能阻隘預守備何至四野烽煙摧吁嗟乎薄祿總磨

民社職保障申嚴豈無譴夕照停鞭空嘆息

弔賈客

周超

亂離莫賤販夫名拔刃捐軀志獨貞大吼轟天人盡廢
九迴委地賊猶驚身羞蜚影三招辱命等鴻毛一擲輕
應笑計然推善筭遙垂七策止謀生

弔朱忠令

周超

關中鼙鼓勢縱橫殘破荒城邑宰驚勁卒三邊猶失守
孤臣八口盡捐生冰清泉路形先現瓦解山河力尙爭
隆準無慚漢祖裔魂歸故里恨難平

弔武妃

周超

黃巾白馬勢縱橫。妃主捐軀并共清。絕勝湘君揮淚死。
羞從羊后腆顏生。重泉有志尋龍種。荒塚無人奠兕觥。
薄宦忝持風教職。奚容康定不蒙旌。

弔劉氏

周超

枕尸慟哭恨無天。簇擁難摧烈性堅。豈忍纖腰馱馬背。
自甘延頸飲龍泉。綠林敢使朱顏汗。芳草猶教碧血濺。
寄語史臣彤管載。清風嶺上舊痕傳。

仙童原

方士模

經過原上路。怪石踞松根。一自仙童去。千秋暮雨昏。砧
聲傳別浦。瓜蔓匝孤村。地古人多壽。鉏犁課子孫。

宿龍山寺贈雪岸上人

方士模

石磴盤空上，禪林帶夕曛。俄然身外事，已付嶺頭雲。花
影閒堦照，蟬聲隔院聞。剛來逢結夏，聽偈到宵分。

深山僧臘古，白髮倚枯藤。筆渴春江水，心寒玉井冰。鐘
聲檐外月，人語佛前燈。去住憑浮世，何須憶武陵。

貧民行

方士模

中陽之民勞且苦，西山高下皆瘠土。鑿坏作廬，長兒孫
倚蘿爲幕，雲爲戶。土銛然，煤照眼紅，煨背詎分寒與暑。
轉託充饑，半糠粃。客至倉皇憂空釜，鶉衣綻裂，胷不遮。
鵠面皴枯，氣如縷。游荒三載，幾空存。父子散竄迷處所。

招來田舍已榛蕪官賦私通浩難數我今承乏懷撫綏
無術深慚衆人父昨朝有檄督催科流民難繪心酸楚
勸農 方士模

桑陰布穀鳴田家競舉趾辛苦此農夫披衣亟晨起巡
行遍郊垌青塍時憇止勞來傾壺漿聽誠集疆以昔者
魃頻災維草宅其址揚箕砥牝糠採山餌石蕒歲事滋
漸登不聞呼庚癸三春靈雨零四野輓轡委時哉不可
失努力割疆理畎深耐風旱器庀戒竄此毋爲鹵莽耕
庶博田畯喜盛世無遊民黍稷看薿薿

望緜山弔介之推 方士模

拔地蒼崖起，岩甍劃碧天。晦明秋色裏，凸凹暮雲邊。白骨旌何補，青烟禁尙傳。幾時一藤杖，憑弔倚層巔。

丁未首春三日，有雉來署中，集衣笥上，馴習不去。如家禽，然紀事二首。方士模

政拙惟遵三字箴，無端雄雉到花陰。梳翎爲愛文章色，厲響思明耿介心。自向堦前分鶴俸，不從海上駭鐘音。中牟異績吾何有，謾詡休徵誌藝林。

憶昔祥鸞下德輝。唐開元中楊仲昌令孝義有鸞集公廨桐樹間太守蕭恕表其事於朝

春城今日又顰飛。吉占敢比蛇蟠笥，寵命難希鷺畫衣。却喜無媒來冷署，非關防患遠虞機。公餘宿食能相傍，

沙月示 卷三十四
只當寵鵝換字歸

過鶴鳴古洞 呂文樓

跨鶴仙人去遺踪寄碧岑得音方信近探洞不知深丹
頂雲隨杳黃冠壑共沉空留餘響在千載費追尋

弔雷節婦齊氏 呂文樓

天地有正氣秉作匹婦烈豈爲身後名濺賊有碧血亂
擊罵益厲心若九鑄鐵甘死鉅石下清白不可蟻詔
旌大節存一坏猶凜冽

讀黃太僕公殉難篇 呂肯堂

我聞星嶽鍾間氣生人秉之得英銳殺身成仁自古難

忠肝義胆照天地君不見張文昌守睢陽血戰四百誰
能當又不見顏魯國罵賊舌凌凌氣奪李希烈我今披
讀黃公傳凜凜如見顏張面公馳五馬遼海來汾州方
賴仁風扇大同姜瓖本新降心屢反側舉兵變賊黨突
至圍汾城黃公氣憤經百戰內無宿飽兵外無螻蟻援
羣醜勢方張驚駭東門陷張拳巷戰盡昏靈孤臣力竭
身遭絆痛罵殉城義素裕血灑英風死不仆卹贈太僕
饒榮施勅立特祠金碧聖四篇家訓世德昭文孫開
府牂牁駐天報丹忠不爽真爭光日月廟貌新顏張鼎
足垂千春

文湖漁唱 賈健

文谷經汾滙似湖漁歌傳咏蹟模糊流波千頃舟明滅
欸乃一聲人有無滄海昔曾變黍稷桑田今又走魚鳧
清音水面留風韻想像蘆花蕩裏呼

代西河長命女歌 周天益

儂本漢歌女採風入樂府誰料千秋後巍然食茲土特
因長命字謂儂本仙侶恐斯言不信寔之以漢武更嗤
好事者片碣藏陋語一旦擲以出閭然驚聳聳且問聖
仙號錫自何帝主史冊所不書徽典憑竊取倘遇釐正
人儂將何地處聰明正直一念此汗如雨而乃大標櫟

求儂遇阿姆莊嚴其廟貌輝煌其牖戶尊儂以正位俵
儂以四輔昭濟自有屬紛若競樽俎邑志不知昭濟所
出此晉祠水妃封
也俵儂猗那迎優令婆婆舞周市與曲街喧闐儼如堵
晨則薦牲幣夕猶考鐘鼓姬豎樂趨蹌驕慳偏儼儂熱
腸急供事冷眼自閒顧漸趨漸紛拏警以回祿怒不肯
測天心轉爲廓基宇滅辰縱逆祀宣聖嚴鉞斧哀哉俗
情愚儂亦何屑數但念生育事此理自明楚厥初自天
地是爲大父母或其積累深發祥自乃祖栽者必繁昌
傾者隨顛腐往古暨來今鬼神鑒如炬何人恣嬖阿求
取能越矩矧儂一女身焉能保爾後可惜鼎俎餘陰以

啖狐鼠可惜釵鈿費竭以填谿谷寄意夸毗子何如勤
秩祐爾雖潔肥腩爾雖載清酤豈不聞神不歆非類胡
爲營營徒自苦

馬跑泉

魏國卿

清源初見細涓涓只是尋常石底泉流出短牆才一尺
便驚雪浪撼山前

神泉傳有馬跑痕騎馬空山覓舊源收盡江南好風景
一鞭紅雨十三村

烟籠賢閣

魏國卿

三賢寓里古傳聞師友文侯閣上分百世清風猶澹蕩

一簾佳氣正氤氲。笑他畫棟迷南浦。絕勝晴川漾白雲。
鼎峙於今馨配享。烟籠舊跡。話橫汾。

彪嶺樵歌

魏國卿

萬尋彪嶺鬱嵯峨。中有神仙謫大羅。幾見岡前吹牧笛。
却聞巖際發樵歌。茯苓老處應蹲虎。棋局終時已爛柯。
市上往來人不識。負薪沽酒醉西河。

經上頂山

魏國卿

巉巖突兀撐青空。羊腸一徑綿長虹。綠崖逼仄夾兩脅。
陡從山脊穿雲中。往來過客迷今古。力鑿何年五丁斧。
昇障汾川鎖鑰雄。海宇東南此門戶。登臨忽見頂摩松。

虬枝偃蓋蟠橫峯遍體龍鱗老歲月大夫未肯邀秦封
時排雷雨驚濤起瑣碎羣山皆拱峙松摩山頂頂摩空
肇錫嘉名良有以我來欲問蒼然叟呼吸能通帝座否
恨無謝句足驚人落日驅車重搔首

狄武襄公祠 魏國正

崑崙封一丸天險不可渡王師久環攻蠢蠻終負固天
使親把鉞方畧定指顧元夜大張樂讌飲天未曙巖關
忽崩圻虎穴熊羆據龍衣委逝波震霆掃瘴霧李愬淮
西城鄧艾陰平路公本大將材韓范知之素折節受春
秋恂恂儒者度面涅勸軍伍華胄絕依附二事人所難

殆由讀書故古祠崇報功檜柏風雲護負鼓逢高翁猶
說銅面具

送徐明府同年量移寧武八絕 魏國正

桂籍過聯楚晉通曾攀清話旅燈紅
甲戌春晤公於鹿泉邸舍十年

別後無消息忽報神君卽我公

下車三日政聲馳白叟黃童手額時獄市不驚農在野

士林又頌閔官詩
謂平反庶獄裁行戶勸
農及修文廟牌坊諸事

何人關節到閻羅大猾倉皇失揣摩不見秦臺懸鏡處

鉄鞭偏著鬼幣多
邑中胥役頗橫
公痛懲之乃戢

負螟久假事朦朧一滴紅泉水乳融個是我兒兒類我

青天霧散日當中。邑有二婦人爭于久不決公令刺血
驗之立判上二事尤民間所樂道者

及故
目刮金篋鑒最真珠林一顧得奇珍試看月殿攀枝客

早是珊瑚網裏人。觀風牧李劉兩
生是秋皆捷

琴堂風靜晝無譁對客清談興亦賒折簡有時來草屋

爲言文舉故通家。余閉關久公以譁
誼招時一往焉

文湖芳草露初零有脚陽春去不停十萬人家齊墮淚

笛聲吹折柳條青

北風料峭嶺雲屯琴鶴蕭然出鴈門賸得哀矜心一片

從看塞上轉春溫

徐荆山邑侯由寧武歸里過余留飲賦詩送之

魏國正

有母拋雛去一年空從雲外望青天

公前蒞汾時有青天之號投簪

過我重攜手戴笠逢君許拍肩
捩陣喧闐更漏外楸枰
歷落燭花前來朝又是匆匆別
酒冷香消意黯然

誄肯構郭優生二首

德保

河汾風教在千載故斷然史列儒林傳
詩流樂府篇回
思持節地頗識塾巾賢坐失青雲器
沉緜且問天

舊隱中條下開簾每枕書一生留獨行
九世信同居高
誼徵馴馭頽風激借鋤碑辭垂不朽
試問有誰如

誄肯構郭處士

梁錫璵

懿行鄉之重百年土一邱哲人今不見芳躅自堪留
九世張公宅終身晏子裘瑾瑜光祖德詩禮裕孫謀
騎鶴音容遠招魂草木秋朔風吹夜月陰雨滴青楸
戚里傷彌切素交嗟未休淚添汾水曲併入黃河流

戊子夏五由臨邑回汾郡望中見小廟甚整咨輿隸
得其概因記之

徐浩

古洞青山曲相傳有女仙歸來自文水未記是何年
十八邨相奉三千界不遷隔溪瞻畫角疑在白雲邊
姓氏無人議麻田却翠鉤

相傳由麻田遷跡

郎君已逝矣仙子亦飄

然聲入先民耳

洞中昔有人聲今無聞矣

風銷卧虎阡

此地多虎

行行問

舊蹟與隸口成編

題滙情園 徐浩

園亭誰是主，憑弔亦徒然。
脩竹依前綠，長松獨自堅。
暮雲沉白水，朝露拓輕煙。
化鶴歸來復，曾孫不記年。

登臨縣新城 徐浩

半臨溪水半憑山，人在高低煙樹間。
諸葛造門通西壑，汾陽補閣盡南關。
長空萬里雲霞窟，平野千年禾黍灣。
使者此來宣聖德，老農牧豎盡開顏。

宋神宗賜文潞公詩石刻 曹學閔

元豐失道升羣伎，主蔡紛紛執朝柄。
偉然碩果推潞公，

灌灌老夫留正性河陽出判移魏都身在外臺如棄屏
偶然入贊饗禮成優進公階行賜慶連章乞退仍慰留
改守洛郊被新命瓊林錫宴寵其行祖道簪裾互輝映
宮中寶器出侑觴更有宸章發高詠君臣唱和一時榮
髣髴廣揚際全盛流傳貞石幾摩挲零落遺聞光志乘
當時中外多名臣曲說何爲惑主聽如公聞望冠三朝
曷不疇咨授國政賜詩雖美奚足言裕陵遺恨猶邪正

狄武襄公祠

曹學閔

百戰曾將宋祚恢穹碑紀績尙崔嵬致身有具從行伍
黥面無妨出將材談笑從容韜畧合儀形颯爽畫圖開

蕭蕭風栢門堂路猶似崑崙甲騎來

故鄉祠貌儼來歆青史威名世共欽
帳下孫張才孰並朝端韓魏契偏深
大勛屢向巖疆建浮議休愁末路侵
一種深沉傳智畧要從慎密識公心

鶴鳴古洞

曹學閔

王喬去緱山令威辭華表仙踪一以遙
鳴鶴音亦杳何年有黃冠此間結茆草
羽化托靈禽騎之赴瑤島道人
不復還鶴響猶繚繞古洞清且幽
遊人恣尋討偶然一鼓掌嘹唳出深窈
山空谷應聲疑和在陰好我愛巖壑
殊攜筇展遐眺琳宮掩靄間雲氣散
晴曉冷然風一來

蕭灑滌塵抱長嘯學蘇門招鶴下林杪

卜山曹學閔

山頭濃翠自氤氲退老高賢此避氛千載儒宗詩禮著
一堂文學晉吳分隱泉曲折沿蒼麓石室荒涼鎖白雲
謾謾松風崖畔起空林疑有詠歌聞

臺駘廟曹學閔

昔聞金天子嘗爲元冥師厥嗣曰臺駘世業克繼之帝
用嘉乃績封之汾水湄沈妣及薦黃守祀沿宗支滄桑
數變更滅沒不可知傳書晉侯疾茲神實祟爲當時鄭
國僑博物無所遺數語聳君聽血食爰在茲立廟始唐

代棖楠隆其儀水官既受職肝鬻存
有司功澤在斯民有禱必應時
村巫走報賽或降雲中旗願神
惠茲土場雨無愆期視彼汾流
長利賴同出貽

渡汾水

曹學閔

權歌處處放晴川風物依稀見昔年
歌向中流傳漢帝渡經萬里感唐
賢當時行殿蒿萊沒幾頃文湖荇
藻連便欲攜琴彈一曲試看鴈影
落遙天

石盤山

曹學閔

花村西去路林岫望中明積翠千巖
落孤雲一徑平羣臺留絕頂雉堞
隱遙城拄策蒼茫處松風走壑鳴

初抵臨境石門塢作

丁宗懋

相傳離石舊僻處大河東一水來天上羣巒在眼中纖
盤榆半綠冷淡杏初紅最好知時雨今宵四野同

城工成東樓讌集喜賦二首

丁宗懋

險絕岩疆捍晉汾滿城佳氣靄氤氲河流千里成天塹
地控五原接塞雲廢墜何年空悵悵綢繆未雨獨殷殷
不煩鼙鼓人趨事斷續歌聲雜杵聞

高樓此日啟芳筵屈指重新到百年蟠地雲根皆壁立
枕山雉堞宛行聯版圖式廓昇平世耕鑿羣安作息
天況復西疇歌大有臨風欲試武城絃

過孝子宋如隱廬墓所

梁文五

純孝傳於昔，豐碑樹至今。故廬烏喔喔，如聽蓼莪吟。

漢槐

康載嶠

有道祠前卧古槐，相傳當日手親栽。千秋榮落標孤節，一代興亡付劫灰。偃蹇自安泉石志，摧殘應痛棟梁材。祇今繫馬濃陰下，猶見高風拂面來。

己亥季夏雨後同諸社友遊柏窰山卽事

劉鑑

山口雲深萬樹攢，穿雲樹杪上層巒。息林野鳥千巖靜，挂壁流泉六月寒。濟勝苦無康樂屐，尋源剩有葛洪丹。相逢試問鑽山客，五尺石稜何日完。

自煖泉公回途中口占

朱懋炳

肩輿宵涉任家灣，問俗何妨帶月還。
麥秀最宜春後雨，雲輕不碍望中山。
傍溪茅屋河流近，薄暮村墟卧犢閒。
勤儉不忘好樂戒，唐風猶喜在民間。

柏窰山卽事

厲清來

寂寂深山遍屐痕，羣峯限日斷晨昏。
數堆雲罩松環甲，千尺崖高柏抱孫。
遺世惟公勞寤寐，多情遲我伴琴尊。
低徊自惜飄蓬侶，散漫形骸安足論。

丁亥孟夏陪朱堂臺王學博步禱柏窰山歸途得雨

賦此紀事

王吉士

不教大地苦如焚，虔禱殷殷向水濱。

泉在聖母廟前，冬夏清冽，不增不減。

一片雷聲轟報雨，半空風色密堆雲。千村禾黍沾膏澤，

萬戶謳歌頌使君。回首再看隴晦畔，秧針刺水正堪耘。

柏窰山卽事紀勝

曹鑑任

柏窰雙柏不記年，挺標盤石根蜿蜒。使君知我好奇特，
手磨如拍洪厓肩。紫芝碧蘚乳常滴，服之可以成飛仙。
有客導引上絕頂，乃是能詩老鄭虔。攝衣扳藤長發嘯，
清陰萬木穿雲烟。衆山羅列兒孫立，猿鳥閒閒虎豹眠。
巖壑幽哉夜雨綠，及時好花開後先。攜琴堪奏南薰曲，
一彈再鼓咽流泉。下視郊原多起色，絃歌滿城禾滿田。

沙州府志 卷三十四
三
乘興載酒若甘醴舉觴豪飲翠微巔抽筆伸紙酌大斗
不惜盡醉傾百千岑參漢陂事已往但留工部之長篇
公餘行樂正六月入林炎涼分判然此身恍似東海鶴
暮栖三島朝九天兩腋風生殊覺爽落霞斜照推言旋
從茲別路紅塵遠何日重來話澗邊

漢槐

王謀文

生意婆娑紀漢年古城風雨弔寒烟二千歲月盤根老
百尺欄杆抱影圓漫樹旗亭留醉客得尋華表拜高賢
征車頻向花黃過都在先生藻鑑邊

七星槐

王謀文

五沃之土產嘉木道傍歷歷種如粟昨從城東識漢槐
銅柯鐵幹贊不足官舍驚看得未曾好奇徃徃供所欲
端使身閑雅興多却對軒窗開兔目此樹移來數百年
深根貫石枝垂屋雲氣遙來山脈連苔痕欲斷波紋蹙
凝姿爲帶曉烟青交蔭初宜春雨綠香飄漫繫玉駒駢
葉密應棲金鸞驚玲瓏七竅歎絕異錫此嘉名誠不辱
中藏月魄影惺忪上應星精光熠煜卽今列宿羅心胸
喜見文章出笥腹靈秀雖云造化功神奇原不受凌觸
我來相視若忘形赤腳歌吟屢徃復材大希逢匠石嗟
賞真那不誇予獨摩挲差慰平生心兩袖頻攜風穆穆

高譚便可藉花茵清讌無勞設遽苗天上常看映白榆
人間幾度然紅燭但得終朝賦酒泉底須遙夜聞絲竹
遭遇由來非偶然寄懷豈必都諧俗歸去溪堂繪作圖
對君日日酬醪醑

邑志載小人悍愚輕於犯法余甚憫之作此示勸德貴

漫言下里屬愚氓五氣都從造化生肢體全歸敦孝養
農桑世守篤庸行醇良禮讓能弭患刁健頑殘每觸刑
幸際雍熙敷化日願胥擊壤慶昇平

文湖漁唱

馬錦襄

不辨天光與水光滄浪歌處問滄桑漁家風月迷幽火

鱗族烟波是故鄉。欸乃一聲雲拂影。隱然半櫂笛生涼。
卽今望去猶疑練。可有絲竿掛夕陽。

狄武襄公祠

程學孔

宋時武功誰足數。將軍磊落起行伍。百戰元昊掃妖氛。
畧地攻城闢虜虎。韓范二公竒其才。左氏春秋授干櫓。
將軍折節肯讀書。異畧竒謀動人主。丹青圖像霽天顏。
樞密宣麻冊天府。儂高流毒廣東西。天兵南討敢余侮。
朝廷命將重出師。臣青爲國奮厥武。夜半飛奪崑崙關。
賊將見面面如土。始信布地百錢紅。振旅闐闐奏凱鼓。
勲名自足照簡青。識量更能高萬古。頰邊涅字不肯除。

梁公像在非吾祖凌烟閣上多功臣有如公者今吉甫
土人俎豆春復秋桂酒椒漿薦歌舞

介山思烟臺

程學孔

樹隱綿山路崎嶇石磴連霜寒臺畔草雲過廟旁烟蛇
蟄焚林後鴉鳴禁火前只今偕隱處臨眺獨潸然

鶴鳴古洞

李瑞

古洞深幽寄此生人言跨鶴入雲行峰頭悵望無飛影
谷口空傳有唳聲響接山岩聞嘒嘒韻來崖壑覺清清
仙姿不識歸何處落得餘音應手鳴

文湖漁唱

李瑞

文湖好景舊曾多最愛漁人發棹歌一曲新詞翻錦浪
幾回古調散清波聲隨綠水無心去響逐金鱗得意過
緬想遺踪何處是依稀還自聽吟哦

彪嶺樵歌

李瑤

採薪嶺上白雲平緩步高歌入調清每向峯頭吟泄泄
時從曲裏度丁丁林飛逸韻兼山響澗落餘音繞谷鳴
妙有牧童牛背笛吹來又和兩三聲

謁卜子祠

程學曾

教澤西河訪古賢儒先此地有真傳下山遠接尼山脉
汾水遙通泗水淵鳥語書聲紫嶺上風鳴桺韻過林邊

至今石室誰爲主藤繞苔封不計年

謁汾陽王廟 辛顯祖

維唐七葉山逢鬼天子蒙塵狼薨尾令公手扶半壁天
克復兩京績何偉吐蕃突爾兵氛起倉皇勅公一幅紙
奪海內於群盜區大河南北復姓李騫地酋兵驚若雷
都訝令公天上來羅拜歡呼還起舞靈臺車騎捷音回
嗚呼補天浴日功如此血食千秋應不死下馬擎觴酌
斷碑廟貌嗟峨峨儼仰企

過向陽峽 辛顯祖

五丁鑿破混沌竅劈分兩壁陡且峭中有羊腸一徑通

絕頂瑩瑩燭籠照崗巒
凸凹尖前路霜皮黛色列古樹
山雀輕翻雉雞飛野狐
突跳蹲狡兔懸崖欲墜迎眸來
瀑布飛噴白雲開陰風
颯颯疑虎伏曲磴盤迂斜陽催
欵段崎嶇三十里望中隱隱近村市
行人莫唱行路難
迢遞西來山邈迤

汾陽宮懷古

辛顯祖

北齊併後南陳滅混一金甌堅似鉄
六茹勤儉土成金
阿麼哮矚百姓血也知外間多圖儂
行幸猶築汾陽宮
汾陽宮殿巧玲瓏江北江南杼柚空
太原公子提戈來
一呼天下歡若雷魚潰鳥離切火後
汾上於今剩殘灰

紛紛紛紛脉脉流不見當年帝子遊蔓草萋萋賸鬼莽
滿目蒼涼白雲浮

續增志書目錄

新脩

萬壽宮記

重脩汾州府學記

新脩汾陽王廟碑記

汾州府惜字紙會碑記

脩復馬跑泉入城渠道記

原公水非峪道河說

開修黃蘆嶺車路碑記

新脩

萬壽宮記

今直省郡縣所在建設

萬壽宮恭奉

皇上萬歲牌位凡遇元日冬至及

萬壽聖節所司先事埽除潔清屆期文武僚屬黎明齋
漱入陳鹵簿奏廣樂肅拜跪成禮而退凜然天威
不違咫尺義至嚴而典甚鉅也汾去京師千里計
旬日可達特守土官非循計典及因事調取不得
輒觀

天顏則於此北面稽顙儼天日之臨亦藉展忱悃而昭
恪恭焉宮之建也肇造於康熙己巳迄今歲久陞
垣門屏間不無殘缺剝蝕久而弗治慢孰甚治而
弗整慢又孰甚顧予以爲人臣之事上以恭寧惟
是習待漏之故事與舞蹈之隆文亦將念

聖天子惠安元元寄其責於郡守牧令以爲爾固知一
府之事一州一縣之事者勤恤民隱而不壅於上
聞宣布德意而不格於下逮是卽以敬民事者敬
君事也傳曰不忘恭敬民之主也不忘乎君斯不
忘乎民勤民其敬君之本乎乃者屬有脩學之舉

因議

萬壽宮並時興脩其木石之需工匠之值悉依廟工之例絲毫不以派累仰體

皇上軫念民艱而不敢輕用其財與重勞其力未逾月而聿觀厥成自今俯而趨偃僂而入瞻觚稜而望金闕將所謂進盡忠而退補過者胥於是乎在寧非揭虔昭敬之一端哉抑詩又云夙夜匪懈以事一人夫凜夙夜之義者無時而不心乎君卽無時而不敬乎君朝正賀至其暫也非其常也吾與二三僚屬勉其常而無忽其暫也可

雷汪度

重修汾州府學記

汾郡學之移建創始於前守郎公踵而成事者劉公閱六十載而前守史公鼎新之迄今又五十餘年矣中間踐履迭更正署非一率皆逆旅傳舍其官而學宮之興廢未或過而問也夫人居處宮室慮風日不蔽猶望後人塗茨垣墉以時葺葺况煌煌聖人之居士林習禮講藝之所聽其傾圯剝落匪特不足以耀文采大觀瞻而

先師之靈爽不安卽守土者之心其何以卽安余以乙未冬蒞治涓吉謁廟顧瞻徘徊見殿堂兩廡之間

木朽石泐旁舍鞠爲茂草慨思繕葺計費數千緡
如召聚紳士耆老議捐助非不易於集事顧余方
務與民休息不欲以此重煩吾民爰自籌經費擇
郡中一二廉幹者董其役汾陽陳令總其成一切
物料工匠悉視民價予直以故工不知勞民不知
費凡閱五月而告竣其規制視昔無異加以瓴壁
峻整圯墁增華庶幾安几筵隆享祀而不傷民之
力與財於余心其可以差慰也雖然天下事經始
難善後尤難前此五十年史君之脩之也崇閎雕
拱危垣文陛盡一時丹雘之觀謂可焜耀數世矣

乃幾何時而頽廢剝落不無藉於後人之增脩潤色設過此數十年而扶植者傾壞補苴者滲漏增新飾舊勢必仍重累吾民不可不爲久遠計也用是詢諸學博舊有學田若干畝檄委汾陽虞尉履畝勘查鈎稽隱匿酌增租額以儲歲脩之資而以其餘稱貸出息又以其餘撥入西河書院廣學舍增膏火計不出十年可收倍息無算學宮之歲脩既無庸別籌而書院亦藉津潤焉夫古西河實不在汾治書院之以西河名雖近附會然當日卜子夏以文學科設教其風化當無遠不被今於振興

學校之餘更加意儲才育賢之地俾得暢餘波而
廣風厲倘亦吾

夫子所深嘉而樂與者乎廟工之成例得詳書本末因
誌所以不擾吾民之意并及措施善後之方勒諸
貞石以告來者其地畝段落並租額別刻碑陰雷
汪度

新脩汾陽王廟碑記

汾故有唐汾陽王謚忠武郭公廟王之再造唐室
有旋乾轉坤之力補天浴日之功其勒勲在鐘鼎
紀事在史冊而姓名不沒於愚夫野老兒童走卒
之口無俟詳書而殫述已惟茲廟祀之建於汾也
竊有感焉古大臣具文武謨略凡効功著績之所
有恩德及民身雖沒而精靈魂魄無日不往來眷
戀於其地後之人因而歌思慨慕設爲禋祀不絕
如諸葛丞相之祀專於蜀漢前將軍關壯繆之祀
盛於荆南其最著也若王前後奉命赴行在出師

調提孤軍轉戰逐北收兩京宮闕復河南北數十
郡縣忠勤敝歷在兵間之日多迨構讒解去兵柄
置散地亦未嘗暫離京師是雖封號汾陽而非食
采邑與臨泣之區則汾之人奔走而享祀之或者
王之靈其未必妥於斯乎然考王生平始則領朔
方兵東討矣繼則以朔方軍保河陽矣最後因河
中亂以王爲潞澤沁等州節度行營是時進封汾
陽郡王屯兵絳州汾離絳雖稍遠實并轄於河東
而澤沁與汾壤相接聲援最近其震疊夫王之赫
濯者固不待聞枹鼓而心驚望旌旃而惕息也王

裨將僕固懷恩屯汾陽縱兵剽掠以王鎮河中始
定懷恩誘吐蕃回紇八寇王度其所領士卒皆故
部曲結恩信素深必不以刃相向後果解散是汾
人之於王不啻父兄子弟之相親腹心手足之相
衛而王之神固無乎不之其尤必往來眷戀於此
則汾之人之祀王也固宜廟故在城北小相里後
移建南關前人脩葺者屢矣近益荒圯無以障風
日有司歲時致祭率奉行故事餘悉不暇經理也
余奉命來守茲土一切城隍壇壝文武廟既次第
增新因念王之功最大汾人之德王最深使其

安靈之所不爲葺治心弗安爰偕縣令陳君料量
經費庀材鳩工閱一月而成事殿宇峻整丹雘輝
煌王之神將顧而樂之繼自今過王之廟登其堂
瞻其像慨然思王之樹奇勲於曩日不惟以武勇
稱而以忠誠著異時有文武才出備國家干城
選亦如王之乃心王室爲良將爲純臣是則王之
佑啓我後人而亦余之所以爲士庶尸祝者豈直
駿奔几筵陳牲薦醴修崇報之令典云爾哉是爲
記雷汪度

汾州府惜字紙會碑記

軒帝命臣頡造字天雨粟鬼夜哭將兆文字之祥
耶抑懼文字之厄耶鑄之琬琰同景星慶雲之光
華宜爲祥也辱諸泥塗如水火兵革之罹劫何其
厄也夫字之利賴於世無論鄉國俊彥操觚翰爲
文章博知遇而梯榮顯卽推而至於官府告令簿
牒之繁農工貿易券約之設綽智愚貴賤而咸賴
其爲功豈不甚鉅顧或簡棄之穢褻之則天降之
罰明神示之殛感應之說彰彰如是烏得不敬且
畏哉女之蠶而織也寸絲尺帛罔不靳惜孰敢毀

而裂也農之力而耕也半菽粒米皆所珍愛孰敢唾而棄也無他衣食之源生民之命無俟督責教誠而民知儆懼也況乎文字之興與布帛菽粟同功而寶惜愛護轉不如饑寒凍餓之切毋乃舛甚士人誦習詩書稍知識字誠於殘瀋剩墨一如農夫紅文之不敢毀裂而唾棄則卽此惜字一舉庶亦徵敬畏之一端歟汾故有惜字會創於前署守劉公設局郡城隍廟責令住持僧董其事官斯土者與紳士按月分別捐貲爲收買費並置地畝爲住持工贍意良厚而立法未周始未嘗不踴躍趨

赴迨遲久而因循怠廢余莅任見汾俗殘棄字紙
委溝渠裹什物糊棚補壁種種褻越怵然驚心議
復前舉適署令李君端黼有同志預籌經費生息
陳君訓亦適差竣旋任共襄厥事仍令廟中任持
收買檄委經歷朱乾按季秤收隨時焚化計息錢
所入可歲買字紙七千餘劬若旁邑聞風興起爭
購入局買費不敷陸續再爲籌補總期紙之交局
源源不絕息之交官生生不窮事可久遠遵行費
復無庸勾貸較前之議捐時興而時廢者相懸殊
絕也夫以廢棄之物供貧民貿鬻之資敬惜之中

兼示撫恤毋亦守土者所宜加意若世俗所云積善行者獲美報藉以覲覲邀福是有所爲而爲善非區區之用心已

雷汪度

脩復馬跑泉入城渠道記

汾晉多山而少水其崇岡突阜土燥石堅間有平曠攪雜砂磧非如東南澤國水泉疏行畎澮縱橫可盡灌輸之利至建置城郭處有雉堞之雄而少深溝之固此其地脈土性伊古而然然有山必有泉坤輿清淑之氣鬱積磅礴溢爲神瀍泄爲靈液天固將以利斯民而因利而利則在乎守土者之斷而弗惑與司事者之勤而固懈夫利苟可垂之久遠雖莫爲之前猶不難創始况明明有前事之師一經脩復事半功倍亦何疑何憚而不爲也府

治西北有馬跑神泉前明正統時奏准疏引萬歷十九年觀察王公重加疏濬更引向陽上林諸泉合流助勢三分其一注於城塹滙於泮池餘則留溉民田俾無缺水此官民渠之所由分也迨後廢不治以致堰崩槽壞渠道漸淤蓋水之不入城者百有餘年矣夫水泉之疏通猶人身之血脉周貫其宣洩之則舒和而諧暢而壅隔之則鬱塞而閉滯近日汾之士民少和樂之氣蓋亦由此余履任以來城垣壇廟節次興修而尤加意於澤宮造士書院育才之地因念渠之興廢士風民氣攸關慨

然復古以百餘年壞壞不振之舉一旦思奮於力
殫財匱之時誠亦知其難也然守土者於興利除
弊之事不爲其難孰爲其易爰檢閱議乘搜剔碑
記適里民趙永康等具詞一再陳請縣令陳君與
余同志而縣尉虞君素能事飭委經理其分水處
所有石閘可據入城故道有踪跡可稽間有坡澗
高下勢難順流相度地形改濬渠路募夫分段修
築城關內外一律疏通俱官予其直無絲毫派累
經始於春仲竣工於八月旣望時際霜降水落而
飛泉噴湧奔趨三十餘里蜿蜒屈曲歷城闌達闌

閭閻賢宮汾之父老咸鼓舞欣忭以爲數十百年
未有斯沾濡洒濯之樂也亦可知是舉之順民情
因地利而非漫爲興作已渠旣成爲設渠長酌善
後經費並繪圖於碑陰俾後來者踵而增修庶可
垂千百年之久而弗歎興廢之靡常也易曰兌爲
澤澤以說物又曰巽爲風屬木而與離火相次木
火通明得巽風而發今渠道由西北兌位而趨東
南收聚巽氣名曰通巽渠巽時興賢育才文明丕
煥所獲有倍於禾麻黍稷之盛而非直爲日用飲
食之需者區區之心有厚望焉

雷汪度

原公水非峪道河說

原公水之稱馬跑泉或以北魏賀魯將軍得名或以七國時原過得名代遠蹟湮無庸深考唯以馬跑泉卽呼峪道河其謬不可不辨馬跑發源於白彪山離城四十餘里其分水處亦離城三十里而峪道河在趙金庄之下金井以上誌稱有閘泉湧出在城北賈家庄八里而近其不能逞流而上與馬跑同源明甚渠之入城奏准於前明正統脩濬於萬歷辛卯前人碑記止稱西北諸泉若上林向陽並疏引合流助勢不聞更引峪道河之水并達

城濠也按驗圖說馬跑起於城之西北而趨東南
峪道河則在城之稍北而趨南其途邇曲折轉西
而復東北滙達文水此則支流派行之合而非尋
源發脈之同也今分馬跑十之三經趙庄村白草
坡而下進城之西關分十之七經桑溝村下金庄
諸堡灌溉及於羅城金井是峪道河乃分食馬跑
之水而並非官渠分峪道河之水前脩乘誌於原
公水之下既分列峪道河一條而中又云原公水
俗呼峪道河已覺矛盾復云春初秋末農事不舉引
三之一入城過時則聽農民灌溉竟以官渠所分

馬跑泉之水轉若民間私據之水暫借官爲引用
夫以官渠所過之趙庄村馮家堡而下向無涓滴
較之峪道河諸村專享七分之利已屬後盈而此
細若再影射以便私圖匪獨偏枯矣陽而於水泉
之源流不分亦烏足信今而傳後茲余脩復故渠
引水入城爲汾郡士民疏通氣脈培植文風恐來
者瞽惑無稽使豪強復遂兼并之欲而渠道不復
經理因著辨而錄諸梓俾得以詳覈焉

雷汪度

開修黃巖嶺車路碑記

夫民爲邦本食爲民天稻黍稷麥菽所以立生民之大命也然而土地有廣狹人民有衆寡產穀有盈縮資賤欲流通其間不致有此絀彼盈之患則又資手商販轉運而轉運之法水以舟陸以車此大較也西北多山少水則於車宜至於車輓所窮則又濟以馱運夫馱運之與車載其多寡難易相去較然已故爲民食計必先通其行運之路除高崖巨壁深溝激澗萬無可通則已若間有陂陀磴确人力可施及前已開而後經阻塞則在乎司事

者隨時經畫不遺餘力事雖創而實善於因便民之法莫急於此汾屬永寧州之磧口毗連陝省且通邊外歸綏一帶商人遠販粟麥裝載皮船自黃河順流而下聚集其地汾郡屬邑并太原平陽諸處俱資接濟但汾永交界有黃蘆嶺橫亘其間羊腸盤結間不容軌僅藉牲畜馱運爲數無多而囤積之處徒患壅滯余因公赴永道出黃蘆嶺詢知鄉通軌道不知何時斷塞隨檄委冀村柳林兩巡檢分路確查何處可以增修何處必須更易自黃蘆嶺東至汾西至永各若干里丈各若干步應用

夫匠名數若干僱值銀數若干悉心勘估繪貼圖說隨酌籌經費檄飭汾陽蔡令永寧方牧督率開修經始於季春終仲夏凡三閱月先後報竣其省州治至磧口尙百餘里臨永兩屬犬牙相錯石路崎嶇方思有以闢之適州學生陳秉謙愿捐承辦余嘉其好義卽允所請另委委員督理其事今亦一律修整平坦自此軌轍通行商賈輻輳旣無居奇之弊亦無糴貴之虞此余自蒞任以來所時時厯念茲得刻期歲事且毫無派累於民而民已獲益區區之心藉用少慰至善後之策歲修之資現

同牧令等妥細酌商明立規條俾永遠遵行不致
中阻康莊衢道百世利賴焉可也工竣之日宜勒
石以垂永久一立黃蘆嶺一立磧口鎮其穀落步
數及工匠價值與一切善後事宜別刻碑陰

協辦志事

戶部山東司員外賈生琇

前任江南建陽衛守備候補遊擊王邦迪

候選布政司理問呂審燾

議敘主簿卞懷調

議敘州判卞爾垣

議敘縣丞董忭舒

州同武汝翼

千總王恒茂

千總張乾昌

貢

生王愷

貢

生李開江

貢

生張書政

貢

生郭繼傳

監

生趙忠

監

生趙維淮

監

生任從直

監

生卞懷謙

監

生卞爾潤

監

生張素莊

監

生任元龍

監

生宋祖黨

監

生侯希武

監

生張明元

監

生劉錦祿

監

生曹光鼎等
張樹功

梓人稷山葛瑾璋